

ICAMANTIRI TASORENTSI JOA PAITARICA IRANTAYETERI JESOQUIRISHITO.

Intanacaro Joa isanquenare.

¹ Intasanotacaro Tasorentsi, icamantaqueri Jesoquirishito, impoji yovaajiniri iriori inampire, impoji iriori yovaajanaro narori, meeca novaa-jeitempiro avirori. Nopincatsataqueri Tasorentsi, aisati piquempejeitaca, pipincatsajeitaqueri avirori; meeca icamantajeitaquee paitarica iran-teri Jesoshi: eiro osamanititsi irimatantearori.

² Ari oshequi iotacaaquena Tasorentsi aisati Jesoquirishito: ainiro icamantaquenari aisati inijaquenari. Meeca noncamantajeitempiro jaoca ocantari.

³ Iroimoshirencajeiteri Tasorentsi maaroni neanateroneri oca nosanquenajeitaquempiri aisati maaroni quemajeitavaqueroneri. Iro cantaincha eiro iquemashitarotsi, irointi irimatanotero ocantaqueriri inquimoshiretanteari. Pamene, eiro osamanititsi irimatantearori Jesoshi maaroni oca noquenquetsatacotiriri.

⁴ Narotaque Joa sanquenatirori oca. Nosanquenajeitaqueneri savicajeitatsiri anta Ashiaqui, aisati iriori yora quemisantajeitatsiri anta 7 nampitsipeequi. ¿Ainirojeimpi, maaroni? Ainiro Tasorentsi iriori, irosati icanta: itimini peerani, irosati meeca; irosati incanteani,

coajica. Nocamantaqueri: “Pincavintsaajeiteri noyemisantaririnte anta Ashiaqui, cameetsa pisavicacaajeiteri”. Irosati nocantaquerori Ishire, ora quiso oiriri ipincatsariventanti. ⁵ Irosati nocamantaqueriri Jesoquirishito: tempa cameetsa yovaajeitaqueero arori icantaqueriri Tasorentsi. Iriotaque nijantajirori itinaanaja, aisati ipincatsariventajeitiri pincatsarivetachari aca quipatsiquica. Oshequi antajeivetacaro caari cameetsatatsi ajajeitanteameri Sharincaveniqui, iro cantaincha oshequi ineshinoncajeitaquee, yaparajatimentaqueueero iriraja, yoavisacojeitantaqueeri. ⁶ Icantajeitaquee: “Pincarajeitena ampincatsarijeitaje, aisati pinquenquetsatacaapiniteri Apa: pincanteri iramitacojeiteri piyemisantaririnte”. Tsame ampincatsatasanajeiteri maaroni, ancantaitiyempani. Aitaque ancantajeiteari.

⁷ Pamene, inquenapaaje mencoriqui, aitaque aneajeitavajeri maaroni. Aisati irineajeitavajeri pajacojeivetacariri peerani. Ari intsaroacajeitavaqueeri maaroni tseencajeitiriri, iriraajeitanaquea, jii, jii. Queario, aitaque oncanteari. ⁸ Te impashinitapiniteji Avincatsarite, itasorentsi-taque, irosati icantani: peerani, aisati meeca, aisati coajicani. Icanti: “Narotaque intacarori maaroni, aisati narotaque vecarayeroneri maaroni”.

Ijivataqueri ineaqueri Joa.

⁹ Ari, noyemisantaririnte, aquempetava-caajeitaca: aquemisantajeitaqueri Jesoshi, irootaque yoashinoncaapinijeitantaqueeri

tseencantatsiri. Ipincatsariventajeitaquee
 Jesoshi, irootaque amavejeitantacarori.
 Noquenquetsatiro irineane Tasorentsi
 aisati noquenquetsatacotaqueri Jesoshi,
 irootaque yojocanteetaquenari aca ovoyejaqui
 ipajiyeetiri Patimoshi. ¹⁰ Ari tomincoqui
 noquenqueshiretasanotaqueri Tasorentsi, irosati
 noquemantacariri iquenquetsatacaquena.
 Antearojenca ineanataquena, iquempetacari
 tiorentsi; jajencaitaque irineane, ¹¹ icantaquena:

—Pisanquenatero maaroni nonijaayetempiri,
 impoiji pimpacanteri quemisantajeitatsiri
 anta Ejesoqui, Eshimirinaqui, Perecoaqui,
 Tiatiraqui, Sarireshiqui, Jirarerejaqui, jero
 Araoriseaqui. Ocarataque inampipee 7.

¹² Nopitsocashitanacari yora quenquet-
 satacaaquenari; ari noneaquero onantari
 veera, ocarataque 7, yovetsiqueetiro oro.
¹³ Nianqui noneaqueri isatecaca quempetariri
 Jesoshi, yora poneainchari inquitequi peerani,
 iquempetapaaca yatiritantapaacaniri. Iquit-
 saataro tsantsashitsari iitsaare, onaque inejiqui
 quempevetarori ishiticatsaqui, yovetsiqueetiro
 oro. ¹⁴ Oquitamaroishitasanotaque iishi,
 oquempetacaro ampeji aisati sharaca: quitamaro
 catsini. Oquempetacaro iroqui paamari amore-
 qui. ¹⁵ Oshipaquireaque iiti, oquempetacaro
 ashivotatsiri saancanatatsiri. Antearojenca
 ineanati, iquempetacaro oshequi ovarijare
 antearo, sooo. ¹⁶ Yajiricaqueri iracosanoriqui

7 impoqui; ocontetapaaque ivantequi
 ivesamento, otsaampiti apite omititsaqui;
 oshipaquireasanotaque ivoro, oquempetacari

catsirincaiteri, ishiquaireasanotaque,
shipaquirerere. ¹⁷ Noneantacariri, notaanaque
iitiqui, toren. Oquempevetaca nocamaque.
Ipamitaquena iracosanoriqui, icantaquena:

—Eiro pitsaroacaanatsi, narotaque
intasanotacarori maaroni, aisati narotaque
vecarayerone maaroni. ¹⁸ Naro aneasanotatsiri.
Nocamasanovetaca, iro cantaincha naneanaji
aisati; meeca noncantaitatitempani nanee. Eiro
nocamajitsi aisati. Narotaque cantajeiterine
ariorica incame atiri, eirorica icamitsi; narotaque
cantajeiterine janicarica jatatsineri inquitequi
aisati janicarica jatatsineri Sharincaveniqui.
¹⁹ Meeca pisanquenatero oca pineaqueri, aisati
pisanquenatacotero nantayeteri coajica. ²⁰ Meeca
noncamantempiro caari pioti incaranqui.
Pineaqueri impoquiro najiricaqueri: ishiaqueri
yora jivatacaajeitiriri quemisantajeitatsiri
anta 7 nampitsipeequi. Meeca piotaque
nopincatsariventajeitiri. Aisati ora onantari
veera: oshiaqueri maaroni quemisantajeitatsiri
anta nampitsiquinta. Meeca piotaque quiso
noajeitanaqueri.

2

*Isanquenajeitiniri quemisantajeitatsiri anta
Ejesoqui.*

¹ Jero aisati icantaquenari Jesoshi:

—Jero oca pisanquenateneriri yora jivata-
caajeitiriri quemisantajeitatsiri anta Ejesoqui:
“Meeca noncamantempiro icamantaquenari
yora ajiriquiriri impoquiro iracosanoriqui: yora

aniitatsiri anta onantariqui veera, caratatsiri
 7. ² Icantimpi: ‘Niotaquero pantayetaqueri,
 niotaquero pipomerentsiventaquenaro
 nocoacaimpiri, te pishemearoji. Niotaquempi
 te pishinetimateriji piyemisantaririnte
 irantapinitero caari cameetsatatsi. Ainiro
 jatashivetimpiri cantashitachari: “Narotaque
 itiancane Quirishito”, iro cantaincha piotaqueri
 iramataviterime quemisantatsiri: niotaque
 te pishineteriji inquenquetsatacayempi.
³ Niotaque oshequi pineacatsitimentaquina,
 iro cantaincha te pishemearoji, te pojocajeroji
 pantayetaquenari. ⁴ Iro cantaincha ainiro
 pojocaqueri aparo: peerani pinintasanove-
 taquina; meecari, meeca te pinintasanotenaji.
⁵ Pinquenqueshirejeitea jaoca picantaniri
 peerani; te pinquempejeiteaji meeca.
 Pinquenqueshirejeitea pinquempejeitantiari
 peerani, iroaquerani piquemisantajeitaque.
 Pinquenqueshireempa, pinintasanojeitajena
 aisati. Eirorica pinintajanatsi, nojatashitimpicari,
 notsoncajeitimpicari. ⁶ Iro cantaincha
 timatsi noneacameetsatantimpiri: te
 pineacameetsateroji yantayetaqueri oijajeitiriri
 Nicorashi, yantashiyetaro caari yai. Aisati
 narori, te noneacameetsateroji yantajeitiri.
⁷ Otimirica piquemantari, pinquemavaquero
 oca nocamantaquempiri. Peerani otimini
 Erequi inchato oaneantatsiri: arioricame
 iroyearome peeraniniri, incantaitatiyempanime
 iraneeme. Meeca ainiro quempevetarori
 anta ocameetsaitetinta, anta Tasorentsiqui.
 Ariorica cameetsa pisavicajeite aisati pimatap-

initaquenaro nocoacaimpiri, onquempetaquea poaquearo inquitequi oaneasanojeitempineri: queario pincantaitatitempani pisavicajeite anta inquitequi”.

Irootaque isanquenatacaaqueenari Jesoshi.

Isanquenajeitiniri quemisantajeitatsiri anta Eshimirinaqui.

⁸ Aisati icantaquena Jesoshi:

—Jero oca pisanquenajeiteneriri yora jivatacaajeitiriri quemisantajeitatsiri anta Eshimirinaqui: “Meeca noncamantempero icamantaquenari yora intasanotacarori maaroni, vecarayeroneri maaroni. Icamaque peerani, impoiji itinaanaja. ⁹ Icantimpi:

‘Niotaquero pantayetaqueri, niotaquero oshequi picatsitimentaquina, niotaquero pashinoncaimentaquina: iro cantaincha eiro pipeacotarotsi nompinatasanotempi anta inquitequi. Niotaque oshequi icantimajeitaquempi yora shiavetariri quemisantatsiri. Icantanirojeiveta: “Noquemisanti”. Jaaquea narori, te inquemisantajeitenaji, irinti iquemisantaniroto Satanashi.

¹⁰ Queario, oshequi pinquematsicatearo, iro cantaincha eiro pitsaroashiretitsi. Yora camaari iroiminqueaarantacantempi caravosoqui, icoaque iriotantemperi queariorica piquemisantasantaquina. Oncarate

¹⁰ quitaiteri oshequi pineacatsiyetearo paitapeerica. Pinquearioventenaro maaroni nocamantaquempiri, irosati pincamanteari; impoiji nompinatasanotempi, aisati pincantaitatitempani panee anta nonampiqui.

11 Otimirica piquemantari, pinquemavaquero oca nocamantaquempiri. Ariorica cameetsa pisavique aisati pimatapinitenaro nocoacampiri, eiro pijatitsi avirori Sharincaveniqui' ”.

Irootaque isanquenatacaaquenari Jesoshi.

Isanquenajeitiniri quemisantajeitatsiri anta Perecamoqui.

12 Aisati icantaquena Jesoshi:

—Jero oca pisanquenateneriri yora jivatacaajeitiriri quemisantajeitatsiri anta Perecamoqui: “Meeca noncamantempiro icamantaquenari yora ashitarori ivesamento, tsampitatsiri apite omititsaqui. 13 Icantimpi: ‘Niotaquero maaroni pantayetaqueri, niotaque ara pisaviquira itimi aisati oshequi pincatsatiriri Satanashi: queario isaviquimojeitimpi iriori. Niotaque piquemisantasanotaquena, te pojoquenaji. Peerani itimini pinampiqui Antipashi: yora quenquetsatacotanari, antanarori maaroni nocoacairiri. Pineacojeitaqueri yoyeetaqueri, iro cantaincha te pojocajeiteroji piquemisantaquena. 14 Iro cantaincha ainiro pantayetiri caari noninti. Noshiacantempiro: ainiro yoametaqueriniri Varama peerani Varaca; impoiji iriori yantacaajeitaqueri pijorioririnteni caari cameetsatatsi: ipincatsatashijetaroyovetsicayetiri atiri aisati yantapiniyetiro caari yai. Ainiro meeca picarajeitiri shiaqueriniri yora Varama: yantacaarantaquempi pipincatsatashiyetaro yovetsicane atiri aisati pantashiyetaro caari pai. 15 Queario iriojeitaque oijajeitiriri Nicorashi. Te oncameetsateji

yantajeitaqueri: yantacaajeitimpicari yantayetiri iriori. ¹⁶ Pinquenqueshirejeitanaquea, eiro piquempetajatsi chapinqui. Eirorica pojocajeitirotsi pantayetiri, nojatashijeitimpicari nompoyereaajeitapeempi. Ainiro novesamento novantequi nompesajeitantapeempi, peti, peti, peti. ¹⁷ Otimirica piquemantari, pinquemavaquero oca nocamantaquempiri. Ariorica cameetsa pisavique aisati pimatapinitaquenaro nocoacaimpiri, nompaquempi poyeari caari conijatatsi, oquempetaca nopashijeitacari peeraniniri mana. Aisati nomperi quitamarori mapi, nosanquenatero mapiqui ivajiro iroaquerari: irioteri iriori ivajiro, iro cantaincha eiro iotiotsi itsipapee’ ”.

Irootaque isanquenatacaaqueuari.

Isanquenajeitiniri quemisantajeitatsiri anta Tiatiraqui.

¹⁸ Aisati icantaquena Jesoshi:

—Jero oca pisanquenateneriri jivatacaajeitiriri quemisantajeitatsiri anta Tiatiraqui: “Meeca noncamantempiro icamantaquenari Itomi Tasorensi: oquempetacaro iroqui paamari amorequi, aisati oshipaquireaque iiti, oquempetacaro ashivotatsiri saancanatatsiri. ¹⁹ Icantimpi: ‘Niotaquero pantayetaqueri. Niotaque pinintavacaajeitaca, piquemisanta-jeitaquena, pintacojeitacari pishaninca, piqueari-oventaquenaro maaroni nocoacajeitaquempiri. Aiquero pijatatiye pimatasanojeitanaquero. ²⁰ Iro cantaincha ainiro pantiro caari noninti: pishinetaquero ora Jesavere oamejeitaqueri

quemisantinari yantayetantacarori caari yai aisati iquemisantantacarori yovetsicayetiri atiri. Ocantaveta: “Noquenquetsatacotapinitiri Tasorentsi”, iro cantaincha amatavitapinijeitaqueri quemisantajeitanari.

²¹ Noyeavetacarō onquenqueshireanajeame; iro cantaincha te oncoyeji onquenqueshiretea, te oncoyeji ojocayetajero antayetiri caari ai.

²² Meecca noncamantempi: nojoquuitacayearo, aisati eirorica iquenqueshireajeitatsi yora quemisantajeitirori, noashinoncaasanojeiteri iriori catsini.

²³ Queario noajeiteri maaroni oijajeitirori Jesavere, nontsoncajeiteri, maaroni. Impoiiji iriojeitanaque maaroni quemisantajeitatsiri niotaquero maaroni iquenqueshirejeitiri atiri aisati niotaquero maaroni icoajeitaqueri.

Ocameetsatirica pantajeitaqueri, aitaque noncavintsaasanojeitempi; iro cantaincha terica oncameetsateji, aitaque noashinoncaajeitempi.

²⁴ Yorari pitsipapee, caari quemisantiro Jesavere, aisati caari antasanotiniri icantavetariri Satanashi, tecatsi noncantajeiteri; ²⁵ irointi incanteani inquemisantena irosati nareetantapaajeari.

²⁶ Ariorica pimatapinitaquenaro maaroni nocoacaaquempiri irosati nareetantajeiri, ari nompeajempi pincatsariventajeiterineri oshequi atiri.

²⁷ Oquempetaca narori, icantaquena Apa nopincatsaritantacari, aisati noncantempi avirori pimpincatsaritanosantanaqueari. Ariorica ompariaque coviti, omporocapaaque maaroni, poyere; aisati pinquempetea avirori: pimpoyereajeitajeri

maaroni caari quemisantajeitana, poyere.
²⁸ Pimpincatsaritasanotanaque, oshequi
 noaneenquempi, pinquempeteari impoquiro
 anteariteaquiri. ²⁹ Otimirica piquemantari,
 pinquemavaquero oca nocamantaquempiri' ”.

Irootaque isanquenatacaaquenari Jesoshi.

3

Isanquenajeitiniri quemisantajeitatsiri anta Sarireshiqui.

¹ Impoiji aisati icantaquena Jesoshi:

—Jero oca pisanquenateneriri jivatacaajeitiriri quemisantajeitatsiri anta Sarireshiqui: “Meeca noncamantempiro icamantaquenari yora quiso oirori Ishire Tasorentsi: yora ajiriquiriri 7 impoquiro. Icantimpi: ‘Niotaquero maaroni pantayetaqueri; ijitashiyeevetimpi avirojeitaque quemisantincari, iro cantaincha niojeitimpi nainti oshequi pitseenqui. ² Queariompia, pitseencasanotajicari, pijaticari Sharincaveniqui. Te onimoteariji Tasorentsi pantayetaqueri. Piquemisantaveta: pinquenqueshirejeitea meeca pinquemisantasantanteari.

³ Pinquenqueshiretasanotanajero noneane piquemaqueri peerani: pishiretasanotanajero, pinquenqueshiretanajea. Eirorica piquemisantasantajana, nojatashitempi, noasanquetayempi. Te piojeiteji jaoca oncarate nojatashitantempiri: noquempetacari coshinti, te pioteji jaocarica oncarate irijatashitantempiri incoshitantempiri.

⁴ Oshequi pitseencantajeiti, iro cantaincha

ainiro timaarantaintsiri quemisantaquenari: cameetsa isavicajeiti irinti. Pantajeitaquero caari cameetsatatsi noshiacantaquempiro piquipatsitiro piitsaare; irintiquea quemisan-tanari, te inquipatsiteroji iitsaare; noneaquero oquitetaque, oquitamarotasanotaque. Queario icameetsataque noneacameetsatantacariri.

⁵ Maaroni antajeitaquerori nocoacaajeitaqueriri inquitsaataquearo ora quitamarotasanotatsiri catsini. Ainiro osanquenataca ivajiropee maaroni savicatsineri inquitequi. Nompeajero ivajiropee tseencajeitanari, iro cantaincha eiro nopeajirotsi ivajiropee antirori maaroni nocoacairiri. Aisati noncamanteri Apa: “Iriotaque yoca quemisantaquenari”. Irosati noncamantajeiteriri maaroni inampirepee. ⁶ Otimirica piquemantari, pinquemavaquero oca nocamantajeitaquempiri’ ”.

Irootaque icantajeitaqueriri Jesoshi sarirehisati.

Isanquenajeitiniri quemisantajeitatsiri anta Jirarerejiaqui.

⁷ Aisati icantaquena Jesoshi:

—Jero oca pisanquenateneriri jivatacaajeitiriri quemisantajeitatsiri anta Jirarerejiaqui: “Meeca noncamantempiro icamantaquenari yora cameetsatasanotatsiri, yora Quirishitosanori. Iriotaque ishanincani Iravirini, impincatsariventasanotee. Incanterica: ‘Intsipatena yoca’, eiro itimitsi tsaneemparine. Incanterica: ‘Eiro itsipatanatsi yora’, tecatsi areetacayearine.

⁸ Icantimpi: ‘Niotaquero pantayetaqueri.

Peerani nocoacaitaquempi: “Pinquenquetsatero noneane, namitacotempi”. Ari pimatitaquenaro, irosati meeca pimatitaquenaro: tecatsi incanteetempi iroimajerenteetempi. Te pishequijeiteji, aisati te pimpincatsarijeiteji, iro cantaincha piquearioventajaquenaro nocantajaquem-piri. Picantajaqueri atiri: “Noquemisantaqueri Jesoquirishito”, te pimpashiventacayenaji.

⁹ Ainiro ashaninca quemisantiriri Satanashi, irootaque iquisantaquempiri, iro cantaincha icantashita: “Noquemisantiri Tasorentsi”. Te inquemisanteriji, itseevani. Coajica nareetacaajeitajeari aviroriqui intiheroashitan-tapeempiri, impincatsatashitantapeempiri: iriojeitanaque oshequi nonintajaquem-piri.

¹⁰ Yoashinoncaajeivetaquempi, iro cantaincha piquearioventaquero nocantaquempiri, te pishe-mearoji, irootaque nojocaacoventantaquempiri. Coajica noneantajeiteari maaroni savicajeitatsiri quipatsiqui niotanteari jaoca icantajeita. Ompomerentsitimojeitaqueari maaroni atiri; iro cantaincha, queario nojocaacoventajeitem-pi.

¹¹ Pamene, eiro osamanititsi naretantajempiri. Pincanteani pinquemisantajeite, impoiiji tecatsi tsaneavaquempine pijatanaque inquitequi; pisavicapaaje anta, pincantaitatitempani.

¹² Ariorica pimatitaquenaro maaroni nocoac-ajeitaquempiri, ari nosavicacaasanotempi anta itiminta Tasorentsi: eiro pipiajatsi aisati. Nosatoncaatempi pivancainqui ivajiro Tasorentsi iriotanteeteari pishanincatacari. Aisati nosatoncaatempi ovajiro inampi Tasorentsi: ora Jerosare iroaquerari

poneachaneri inquitequi. Impoiiji iriotanteeteari pinampitaro avirori. Aisati nosatoncaatempini novajiro narori, iroaqueratajantsiri, iriotanteeteari ashanincatavacaajeitaca.
¹³ Otimirica piquemantari, pinquemavaquero oca nocamantaquempiri' ”.

Irootaque isanquenatacaaquenari Jesoshi.

Isanquenajeitiniri quemisantajeitatsiri anta Araoriseaqui.

¹⁴ Aisati icantaquena Jesoshi:

—Jero oca pisanquenajeiteneriri jivatacaajeitiriri quemisantajeitatsiri anta Araoriseaqui: “Meeca noncamantempiro icamantaquenari yora Queariotasanotatsiri, ovaajeerori ora icantaqueeri Tasorentsi: iriotaque Quirishitosanori. Iriotaque intarori yovetsicantaque: imataquero maaroni icantaqueriri Tasorentsi. ¹⁵ Icantimpi: ‘Niotaquero maaroni pantayetaqueri. Pinquearioventenarome nocoacaimpiri, noshiantempime catsirincajari; pintseencasanotename, noshiantempime catsincajari. Niotaque te pinquearioventenaroji nocoacaimpiri, iro caintaincha te pintseencasanotenaji; irootaque noshiantantaquempirori saavajari. Eirorica picoi pincatsirincajate, ari pincatsincajate; aisati oquempetaca, eirorica picoi pinquemisantasanote, ari pintseencasanoteta: eiro piconoirotsi. ¹⁶ Te noncoyeji nirero saavajatatsiri: noquishocajataquero, ontimaite. Aisati avirori, te noneacameetsatempiji. ¹⁷ Picantajeiveta: “Naro ashitaarantajeitachari, oshequi nomayetaque, tecatsi coiteimotajenane”.

Picomitaca: te pioteji pashinoncaaca; pashinoncaasanotaca, tecatsi timimotempine, piquempetaca picaaratsempequitaque. Te piotasanoteriji Tasorentsi: oquempvetaca te pameneji. ¹⁸ Meeca noncantempi: pamanenaro oro cameetsatasanotatsiri, ontimimotantempiri pashitaarantantajeari. Aisati pamanenaro quitsaarentsi quitamarori pinquitsaatantajeari eiro ineanteetajimpitsi, eiro pipashiventantajatsi. Pamanenaro aisati aavintarontsi pincajoquitajeari, pamenantajeari. Pineaquero, ariorica pincantena, ari nonquemisantacaasanotempi, noameetsajeitempi eiro pipashiventantatsi, niotacaasanojeitajempiriri Tasorentsi. ¹⁹ Ariorica nonintasanotiri ashaninca, noametiri, aisati noasanquetairi, iriotanteari eiro yantantajarotsi caari cameetsatatsi. Meeca eiro pitseencantitsi, irointi pinquenqueshireempa: pincoasanotaje pioteri Tasorentsi. ²⁰ Pamene, oquempetaca nocatiapaaca saiteriqui, nocoaque noneempi. Ariorica pineavaquena aisati povetsatavaquena, nonqueapaaque, nosaviquimotapeempi aisati noimotapeempi. Nocoasanotaque ashanincatavacaajeitaquea. ²¹ Tempa nomataqueneri Apa maaroni icoacaquenari, impoiiji nosaviquimotaqueri, notsipatajari nopincatsariventanti. Meeca pinquempetajena: ariorica pimataquenaro maaroni nocoacaajeitaquempiri, ari pisaviquimotena pintsipatena ampincatsariventantajeite. ²² Otimirica piquemantari, pinquemavaquero oca nocamantajeitaquempiri' ”.

Irootaque isanquenatacaaquenari Jesoshi.

4

Iquenquetsatacotiri Tasorentsi aisati saviquimojeitiriri.

¹ Impoiji namenanaaji aisati, noneasanotaquero inquite, tsompoina; oquempetaca ashitareaca ashitacorontsi. Impoiji noquemajiri aisati yora noquemaqueri incaranqui, ariorica ineanati ishi-avetacari tiorentsi. Icantaquena:

—Caatanaque aca jenoquica. Noncamantem-
piro nantayeteri coajica.

² Irosati otentashiretantanaquena Ishire Tasorentsi, irosati inquitequi. Jeri noneapaaqueri Tasorentsi, isaviqui isavicamentoqui ipincatsari-
tantari. ³ Oshequi imarereataque, iquempetacaro mapi marereatatsiri: quitioncanirotatsiri, quenashinirotatsiri, maaroni. Aisati ainiro anta savirentsi, ishoncacaro isavicantari.

⁴ Aisati oshoncacaro isavicantari oshequi pashini savicamentotsi, ocarataque 24. Anta isavicajeitaque 24 savicacantantatsiri, pincatsarijeitatsiri. Iquitsaajeitaro iitsaare quitamaromaori, yamatseejeitaca. Iro yovetsiqueetiri iramatseere oro.

⁵ Oponeaca ivincatsarimentoqui Tasorentsi quempetarori iporequi aisati itirei. Aisati inejitacaro tsiorontsi, ocarataque 7: oshiacantaca Ishire Tasorentsi.

⁶ Aisati inejitacaro incajare, oshiaquero amenaarontsi.

Aisati anta inejitacari aparoni ivira, jeri itapi-
iqui itsipa, jeri iracosanoriqui aisati irampatequi itimi itsipapee ivira. Icarajeitaque 4. Otimi iro-
qui iriori ivoroqui aisati otimi iroqui itapiiqui.

⁷ Ishiaqueri aparoni maniti; irio itsipa ishiaqueri vaca; irio itsipa ishiaqueri shirampari; irio itsipa ishiaqueri paquitsa, itimpavanquitanaca. ⁸ Ari otimi ishivanquipee virantsi 6; oshequi iroquipee, jaocarica onayetaqueri. Icantani ipampoyeaventajeitiri Tasorentsi: quitaiteeriqui, tsiteniriqui; te iroimpacayeroji. Jero oca ipampoyeapinitiri:

Icameetsataque, icameetsataque, icameetsataque
yora Avincatsarite Tasorentsi:

oshequi itasorentsitaque, tecatsi ompomerentsitimoteari.

Icantani itimi: peerani, irosati meeca, aisati coajicani.

⁹ Ari yapiitapinitiro:

Icameetsatasanoti Tasorentsi, oshequi nopincatsatiri.

Oshequi nopasonquitiri yora pincatsariventaquenari.

Icantani yanei, eiro icamitsi catsini.

¹⁰ Ariorica iquemapinijeitavaqueri yora 24 savicacantatsiri, itiyeroashitapinijeitacari Tasorentsi, ipincatsajeitaveri. Yaajeitavero iramatseerepee yoanijeitaveri iitiqui, ipampoyeaventajeitiri:

¹¹ Picameetsatasanotaque, Novincatsarite, oshequi pitasorentsitaque.

Ocameetsati noneacameetsajeitimpi, nopincatsajeitimpi.

Niotaque tecatsi pomerentsitimotempine: tempa pivetsicaquero maaroni timajeitatsiri.

Picoaqueni peerani ontime paitapeerica, irootaque otimantacari meeca.

5

Iquenquetsatacotiri Jesoshi, ishiacantiri ovisha.

¹ Ari noneaquero aisati iracosanoriqui Tasorentsi yampinaicaquero sanquenarentsi, osanquenataca tsompoinaqui aisati acaquero. Ari ampinaicaca aisati otsinetaca: ocarataque 7 otsinetaca. ²Jeri noneaqueri inampire Tasorentsi, shintsitanotatsiri, icantaveta:

—¿Janica cameetsatasanotatsiri irimatantearori irampinaicareajero oca sanquenarentsica, intsinecareajero?

³ Ari namenajeivetanaca, tecatsi anquerine. Tecatsi materone irampinaicareajero: inquite-sati, quipatsisati, sharincavenisati, tecatsi catsini.

⁴ Te intimeji catsini cameetsatasanotatsine, matasanoteroneri irampinaicareajero, irootaque niraantanacari: noashiretanaca te intimeji camantenane ocantayetiri sanquenarentsi.

⁵ Impoiji icantaquena aparoni savicacaantatsiri:

—Eiro piraatsi. Timatsi ampinaicareajeroneri: yora ishanincani Jorani; iquempevetari maniti, oshequi ishintsiti. Aisati ishanincatacarini Iravirini, aisati oshequi ipincatsariti. Imataqueneri Tasorentsi maaroni icoacaajeitaqueriri, irootaque irimatantajearori irampinaicareajero sanquenarentsi, aisati intsinecareajero.

⁶ Ari ainiro anta Tasorentsi, jeri ivira, aisati yora savicacantajeitatsiri. Jeri noneaqueri isatecaca nianqui Ovisha, yamashitaca ora isatayeetaqueri peerani yoanteetacariri. Otimi itseequi 7, aisati iroqui 7: oshiacantaquero Ishire Tasorentsi, itiancaquero otsoteaquero

quipatsi. ⁷ Ari isavicaque Tasorentsi ivincatsarimentoqui, yajiriquiro iracosanoriqui sanquenarentsi, ampinaicapatitachari. Ari ijataque Ovisha iriori, yaapaquero. ⁸ Impoiiji yora virantsi aisati yora savicacantayetatsiri itiyeroashijeitacari Ovisha. Yajiricajeitiro shiavetarori ijaviquimento; yajiricajeitiro aisati shiavetarori tsota, yovetsiqueetiro oro: otimi tsoompoina casancapatsari. Oshiaquero iroori casancapatsari iquenquetsatacapinijeitiri quemisantatsiri Tasorentsi. ⁹ Impoiiji ipampoyeaventajeitiri Ovisha pampoyeantsi iroaquerari:

Ocameetsati pajiriquero avinti sanquenarentsi, aisati ocameetsati pintsinecareajero ora otsineyetacara.

Tempa peerani yoyeetaquempi, aparajatimenta-
jeitacari piraja maaroni atiripee,
poavisacojeitantacariri irisaviquimojeitanteariri
Tasorentsi, maaroni.

Poavisacojeitaqueri timayetatsiri maaroni
atiripee, nashiyetarori maaroni
irineanepee.

Queario, poavisacojeitaqueri poneayetachari
maaroni nampitsipeequi, jaocarica
isavicajeitiri.

¹⁰ Pipeajeitaqueri pincatsarijeitatsiri aisati quen-
quetsatacapinijeitiriri Tasorentsi:
impincatsariventajeiteri maaroni savicajeitatsiri
quipatsiqui, aisati incanteri Iriri iramitaco-
jeiteri.

¹¹ Impoiiji namenanaaji aisati, noneajeitaqueri;
aisati iriori oshequi catsini inampirepee

Tasorentsi: te aparopee irine, oshequisano catsini. ¹² Antearojenca ipampoyeaventajeitiri: Icameetsatasanotaque Ovisha yoyeetaqueri, iojeitaque maaroni timajeitatsiri oshequi itasorentsitaque, oshequi timimojeitiriri, oshequi ioti catsini, maaroni imayetaquero catsini.

Tsame maaroni ampincatsajeiteri, aneacameetsajeiteri, aveshireimentajeiteari.

¹³ Aisati noquemajeitaqueri maaroni savicajeitatsiri inquitequi, quipatsiqui, aisati maaroni camajeivetainchari: yora itijeevetacari quipatsiqui, aisati yovinqueevetari; ipampoyeajeitaque maaroni catsini:

Tsame aveshireimentajeiteari Ovisha maaroni, ampincatsajeiteri, aneacameetsajeiteri, ancantatatiyempani.

Tempa itasorentsitasanotaque, icantani, peerani.

¹⁴ Irosati icantantacari yora 4 virantsi:

—Aitaque ancantajeiteari, ampincatsatasanojeiteri.

Aisati itiyeroashijeitacari savicacantajeitatsiri, ipincatsajeitaqueri maaroni.

6

Itsinecareajiro sanquenarentsi.

¹ Ari ocarataque 7 otsinetaca sanquenarentsi. Noneacotaqueri Ovisha itsinecareajiro aparoni, irosati noquemantacari virantsi, antearojenca ineanati, iquempetacaro itirei, antearojenca. Icantiri quijacotariri cavayo:

—Caate, pimpoque aca.

² Irosati noneantavacariri jivatapaintsiri: jeri iquijacotapaacari cavayo quitamarori, yajiricaquero iveane. Yamatseeeyeetaqueri; coajica irijatanaque inquisajeiteri quishiriri, incoaque iranaacojeiteri irimanateri, impoyereaajeiteri.

³ Impoiji itsinecareajiro otsipa, irosati icantan-tari itsipa virantsi:

—Caate, pimpoque aca.

⁴ Jeri iquenapaaque itsipa cavayo, quition-catasanotatsiri. Icanteetiri:

—Meeca poamejeiteri atiri irimanatavacaa-jeitea, iroavacajeitea.

Ari ipeetavaqueri antearo ivesamento.

⁵ Impoiji yora Ovisha itsinecareajiro otsipa, irosati noquemantacari itsipa virantsi, icantiri:

—Caate, pimpoque aca.

Irosati noneantavacari iquenapaaque potsitari cavayo, yajiricapaaquero quijacotariri imon-caratantayetariri tenayetatsiri, paitapeerica.

⁶ Irosati noquemantacari satecainchari virantsi nianqui, icanti:

—Te aneasanoteroji tirico aisati oquempetaca shinqui, irootaque opinatasanotantacari. Irointi oreji orivo aisati ovaja, irootaque timasanotaintsiri.

⁷ Impoiji itsinecareajiro otsipa, ocaratapaaque meeca 4, irosati noquemantacari itsipa virantsi, icantiri:

—Caatanaque, pimpoque aca.

⁸ Jeri noneavaqueri pashini cavayo, quiteriviti; ipajita yora quijacotapaariri: Caamanentsi.

Yoijatapairi pajitachari Sharincaveni. Icantava-
queri:

—Aviro cantacoventajeiterineri oshequi
atiri anta quipatsiqui, nocoaque pimpeasaan-
tajeiteri, peti, peti; paacantajeiteri itashe;
pojoquiitacaaranteari; pintianqueneri maniti
irantsicaaranteri, irovamaaranteri.

⁹ Impoiji itsinecareaquero otsipa, ocarataque
meeca apapacoron; irosati noneantacarori
itaapinitantarori casancapatsari. Itimi anta
oshequi quemisantajeitatsiri, camajeive-
tainchari. Peerani iquenquetsajeitaquero
irineane Tasorentsi, icamantapinitiri atiri jaoca
icantari Tasorentsi, irootaque yoanteetacariri.

¹⁰ Antearojenca icantajeiti camajeivetainchari:

—Novincatsarite, aviro pincatsariventajeitiriri
maaroni savicajeitatsiri. Oshequi picameetsa-
tasanotaque, pitasorentsitanotaque. Niotaque
otampaticatasanoti pineane, te pamatavitanti-
mateji. ¿Jaoca oncarate pinquisacoventajeitajena?
¿Jaoca oncarate poasanquetaajeitantariri iriori
savicajeitatsiri quipatsiquinta, oajeitaquenari?

¹¹ Ari ipajeitaqueri quitsaarentsi quitamaro-
tasanotatsiri. Icantiri:

—Pimaoreavaquetsita. Tequera omoncarateaji
noasanquetaasanojeitantariri oajeitaquempiri.
Timatsiquera itsipapee piyemisanraririnte iroy-
eeteri. Piquemisantajeitaquena, irootaque yoan-
teetaquempiri; inquemisantajeitaquena itsipa-
pee, irootaque iroanteeteariri iriori. Ariorica
omoncarataquea, ari noasanquetaajeiteri maa-
roni oantatsiri.

¹² Impoiji itsinecareajiro otsipa, ocarataque meeca 6. Namenanaque, jero onिकासनотанаца quipatsi, antearo onicanaca: nica, nica, nica. Itsitenitanotananaque catsirincaiteri, iquempetanacaro tsimenquito; irinti cashiri, iquitioncatasanotananaque, iquempetanacaro irajantsi, quitionca catsini. ¹³ Aisati ipariajeitananaque maaroni impoquiropee: iquempetacaro oitsoqui iyera ora iraacatsiri, ariorica otimi antearo tampea, ari ojireayetanaque. ¹⁴ Opeanaca inquite, oquempetaca yampinaiqueetaquero sanquenarentsi. Opeaca maaroni quipatsi: toncaaripee, ovoyeja, maaroni; poyere. ¹⁵ Aisati noneaqueri ivincatsaritepee atiri, jeri ivincatsaritepee soraro, ashitaarantincari, shintsiyetatsiri, ivatorote, iratiritepee, maaroni atiri: ishiajeitanaca omoroqui imperita. Aisati ishiajeitanaca mapipeequi anta toncaariqui. ¹⁶ Icantajeivetacaro toncaari aisati mapi:

—Pimpariye, pintijajeitena, pimanena. Yaanacari Tasorentsi, aisati yaanacari yora Ovisha. Oshequi iquisaquena. ¹⁷ Meeca iquisajeitaquena maaroni; meeca impoyerea-jeitena, poyere.

7

Isatoncaajeitiri ishanincapeeni Ishirairi.

¹ Impoiji noneaqueri inampirepee Tasorentsi, caratatsiri itsipasati, icatiajeitaca anta otsapitapaa quipatsi; ipeavaquero tampea, maaroni.

Ipeasantavaquero maaroni, caari otimanta tampea quipatsiqui, incajarequi, inchatoqui, jaocarica. ² Impoiiji aisati noneaqueri itsipa inampire Tasorentsi, iponeaca anta iquenapainta catsirincaiteri, yamaquero irisatoncaatanteariri atiripee. Icajemacojeitapaaqueri itsipapee, yora tsoncajeiteroneri coajica quipatsi aisati incajare.

³ Icantiri:

—Eirotsita pitsonquitarotsi quipatsi, incajare, inchato, maaroni. Ajivatavaquerita asatoncaajeiteri ivancainaquu maaroni quemisantajeitiriri Tasorentsi.

⁴ Ari noquemaqueri icantaque jaoca icarajeitaqueri satoncaajeitainchari: icarajeiti 144,000 quemisantatsiri. Icarajeitaqueri ishanincani maaroni itomipee Ishirairi.

⁵ Ari isatoncaajeitaqueri ivancainapeequi: icarajeitaque ishanincani Jora 12,000, icarajeitaque ishanincani Oroveni 12,000, icarajeitaque ishanincani Cara 12,000,

⁶ icarajeitaque ishanincani Asere 12,000, icarajeitaque ishanincani Nejatari 12,000, icarajeitaque ishanincani Manaseshi 12,000,

⁷ icarajeitaque ishanincani Shimeo 12,000, icarajeitaque ishanincani Irevi 12,000, icarajeitaque ishanincani Isacara 12,000,

⁸ icarajeitaque ishanincani Savoroni 12,000, icarajeitaque ishanincani Jose 12,000, icarajeitaque ishanincani Vejami 12,000. Ari isatoncaajeitiri ivancainaquu, maaroni.

⁹ Impoiiji namenanaaji aisati, jeri noneajeitaqueri oshequi catsini atiri aisati, yapatojeitaca: tecatsi ancantea amoncarajeiteri jaocarica

icarajeitiri. Inashijeitaca atiripee, onashijeitaca irineanepee, maaroni. Icatiashijeitapaacari Tasorentsi, aisati anta itiminta Ovisha. Iquitsaajeitacaro quitamarori iitsaare, yajiricajeitaquero compiroshi. ¹⁰ Antearojenca icantajeitaque:

—Iriotaque oavisacojeitaqueeri yora Tasorentsi savicatsiri ivincatsarimentoqui, aisati yora Ovisha.

¹¹ Ari itimi quempeji Tasorentsi yora savicacaa-jeitantatsiri aisati yora virantsi. Ishoncajeitacari oshequi catsini inampirepee Tasorentsi, ipincatsajeitaqueri, ¹² icantajeiti:

Ariove, tempa oshequi ioti Atasorentsite, oshequi itasorentsiti.

Tsame maaroni aveshireimentapinijeitari, aneacameetsatapinijeitari, ampason-quitapinijeitari, ampincatsatapinijeitari; aitaque ancantaitatitempani.

¹³ Impoiji isampitaquena aparoni savicacaantatsiri:

—¿Piotimpa janica yora quitsaajeitachari quitamarori? ¿Piotimpa jaoca iponeajeitari?

¹⁴ Nocantaqueri:

—Teve nioteji. Pincamantena: tempa pioti avinti.

Icantaquena:

—Iriojeitaque neajeitaqueriri yashinoncaajeitaca oshequi atiri; oshequi ineacatsitacaro iriori. Iquivantajeitaro iitsaare iriraja Ovisha, irootaque oquitamarotasanotantacari.

¹⁵ Irootaque yapatotimentantacariri Tasorentsi, intacojeitantacariri anta ivancoqui. Icantani

intacojeitacari: quitaiteeriqui aisati tsiteniriqui. Ari quiso iroajeiteri Tasorentsi iriori, irojocacoventajeiteri, maaroni. ¹⁶ Eiro iquemajeitajirotsi aisati itashe, aisati eiro iquemajeitajirotsi imire. Eiro itaajeitajiritsi aisati catsirincaiteri, eiro iquemaatsicatarotsi aisati paamari. ¹⁷ Ari yora Ovisha itsipatari Tasorentsi: iriotaque Ovisha shentajeiterineri maaroni quitsaajeitachari quitamarori, papinijeiterineri maaroni coiteimojeitacariri. Iroimoshirencajeitaqueri, eiro ishinetiritsi iriraaajeitajea aisati.

8

¹ Impoiji itsinecareajiro aisati, caratatsiri 7. Ari imajerejeitanaque maaroni savicajeitatsiri anta inquitequi. Osamanitapainti omajeretasanotanaque catsini.

Itiojeiti intayetacarori inampirepee Tasorentsi, caratatsiri itsipasati.

² Impoiji aisati noneaqueri 7 inampirepee Tasorentsi, icatiajeitaca Tasorentsiqui. Ipeetaqueri 7 tiorentsi. ³ Jeri aisati itsipa nampirentsi, icatiaca anta itaapinitantaroriquinta casancapatsari, yovetsiqueetiro oro. Yajiricaquero onantajaniquitari yovetsiqueetiro aisati oro. Ari itaagueneri Tasorentsi casancapatsari, oshiaquero oca iquenquetsatacaapinijeitiri quemisantiriri Tasorentsi. ⁴ Ari areetacari oyachaare Tasorentsiqui, ocancajencatapaaque, oshequi inecameetsataquero. Aisati

oquempetaca, oshequi ineacameetsataquero iquenquetsatacaapinijeitiri quemisantajeitiriri.

⁵ Impoiiji yora nampirentsi yaaquero paamari, yoaquero onantajaniquitari, ipishoncaquero quipatsiquica. Impoiiji antearojenca itireanaque, tiriririri; iporecanaque, porec, porec; aisati antearo onicaca quipatsi, nica, nica, nica. ⁶ Irosati yovetsicantajeitanaca nampirentsi intiotanteari.

⁷ Itiotaque jivataintsiri, tii, tii, tii; irosati opariantanaca quipatsiqui iriniqui, jero aisati paamari, oconoacaro aisati irajantsi. Otaarantaca timayetatsiri quipatsiqui, otaarantaca inchatoshi; otaasanotaca iroori saveshi, tojari, maaroni, poyere.

⁸ Impoiiji itiotaque apitetapaintsiri nampirentsi, tii, tii, tii; irosati noneantacarori quempetarori antearo toncaari, tainchari: ipishonqueetaquero incajarequi, pocn. ⁹ Opeaarantaca incajare irajantsi, icamaarantaque timatsiri incajarequi, aisati otsoncaarantaca pitotsipee.

¹⁰ Impoiiji itioti mavatapaintsiri, tii, tii, tii; irosati noneantacarori shiaqueriri impoquiro iparianaque, itaapaaca, pomein. Iparianaque nijatenipeequi aisati anta ocontejayetapaaque nija. ¹¹ Opeaarantaca quepishijari, irootaque icantanteetariri shiavetariri impoquiro: Quepishiri. Icamajeitanaque oshequi irajeivetarori nija.

¹² Impoiiji itioti aisati itsipasatitapaintsiri, tii, tii, tii; irosati itsitenitantavetanaca catsirincaiteri aisati cashiri. Aisati itsivacaarantayetanaque iriori impoquiropee, irosati otsitenitantave-tanaca quitaiteriqui. Aisati ipeaarantayetana

quitaporoquitatsiri tsiteniriqui. ¹³ Ari namenanaaji aisati, noneantacariri anteari paquitsa yaranaque anta inquitequi. Aisati noquemaqueri, antearojenca ineanati, icanti:

—Jo, oshequi irashinoncaasanojeitanaquea catsini savicajeitatsiri quipatsiqui. Irotaintsi intiojeite yora itsipapee nampirentsi, caratatsiri mava, impoiji irashinoncaasanojeitea maaroni atiripee.

9

Itiote impoitapaintsiri mava.

¹ Ari itioti itsipa inampire Tasorentsi, yora apacorotapaintsiri, tii, tii, tii. Irosati noneantacariri impoquiro, iponeaca inquitequi, ipari-
aque quipatsiqui. Ipeetaqueri iyavitararori omoro jatatsiri tsompoina catsini, te aneroji oncaratapee, ² irosati antoo. Ari iyavireapaaquero, itatareapaaquero, jero ocontejencatapaaque oshequi oyachaare. Ojataque jenoqui irosati ot-sitenitananaca jenoqui, aisati iriori catsirincaiteri itsitenitanaque. ³ Impoiji noneaqueri tsinari, iquenantapaacaro cachaa, itsoteapaaquero quipatsi, imatacaaqueri Tasorentsi yoantaque, iquempetacari quitoniro. ⁴ Icantiri:

—Poajeitearo ivanquirepee maaroni caari quemisantajeitana, yora caari satoncaajeitacha ivancainaqui. Eiro catsini poarotsi otsipayetari saveshi, tojari, inchatoshi, eiro catsini. ⁵ Nocoaque pinquematsicatacayeari maaroni caari quemisantajeitana, incarataque ⁵ cashiri, iro cantaincha eiro poamaajeitiritsi.

Ari yoajeitaqueri, oshequi icatsitaque, iquem-petacari quitoniro. ⁶ Ariorica omoncarataquea maaroni oca noneaqueri, ari incoajeivetanaquea atiripee incamajeite; iro cantaincha eiro imatirotsi incame. Incoajeivetanajea iroajeame irisati, iro cantaincha eiro imatirotsi.

⁷ Ari namenasanotaqueri tsinari: iquem-petacari cavayo, ipashicayetaca ashiro eiro aveantaritsi sataamentotsi aisati chacopi. Yamatseetacaro shiirori oro. Orari ivoropee oshiaquero avoropee arori. ⁸ Iviti oquempetacaro oishi tsinane, oquishipeti. Iraji oquempetacaro iraji maniti, antearoquiaji. ⁹ Inejitonqui oshiaquero ashiro, ariorica yaranaque, antearojenca yaranaque, ishiaquero itirei, tiriririri. ¹⁰ Irishi oshiaquero irishi quitoniro, ainiro itseequi. Ariorica yoaqueri atiri, icatsitasanotaqueri, ocarataque apapacaroni cashiri icatsitaque. ¹¹ Ainiro ivincatsarite tsinaripee: iriotaque ivincatsarite maaroni camaari. Ipajita irineanequi jorio Avaroni; iro irineanequi quireshiasati ipajita Aporioni. Iro acantiri aneanequi arori: Poyereantatsiri. ¹² Aitaque icantari yora intacarori oashinoncaajeitiriri quipatsisati. Timatsiquera apite aisati.

¹³ Impoiji itioti itsipa inampire Tasorentsi, yora seishitapaintsiri, tii, tii, tii; irosati noquemantacariri itsipa neanatsiri. Ari oponeacari irineane ora itaapinitantaroriqui casancapatsari, vetsicachari oro. Otimi anta Tasorentsiqui, otiminta otseequi itsipasati.

¹⁴ Icantiri tiotaintsiri:

—Pijate poimisoquijajeri yora 4 camaari yoisotiri Tasorentsi anta antearojaqui eni: ora pajitachari Eojarateshi.

¹⁵ Ari ijataque, yoimisoquijajiri camaaripee. Ari icantini Tasorentsi peerani: “Niotaquero jaoca oncarate impoyereaarantanteariri atiripee. Niotaquero jaoca oncarate omoncaratanteari osarintsi, cashiri, quitaiteri, aisati jaoca incarate catsirincaiteri”. Meeca omoncarataca, irootaque yoimisoquijantajariri. ¹⁶ Yora camaari ijiva-

jeitaqueri oshequi catsini soraropee, icarajeiti 200,000,000. Niotaqueri, icantaquenari. ¹⁷ Aisati noneajeitaqueri iyavayote. Ipashicanejitaro quijacotariri quiraatatsiri, oshiaquero paamari, ora morecasanotatsiri. Iito cavayopee oshiaquero iitopee maniti. Oponeaca ivantequi oshequi paamari, jero cachaajenca oshequi, jero morecasanotatsiri. ¹⁸ Iroojeitaque poyereaarantajeitiriri atiripee: ora paamari, cachaajenca, jero morecasanotatsiri poneachari ivantequi cavayo.

¹⁹ Irootaque yoantariri cavayo atiri: ivante aisati irishi. Iro irishi oshiaqueri maranque, ainiro oitotaca, yatsicantacariri atiri.

²⁰ Ari itimaarantaque aparopee atiri, iro cantaincha te inquenqueshirejeitempaji: te incoyeji catsini inquemisanteri Tasorentsi. Icantani yantapinitiro caari cameetsatatsi, ipincatsatapinijeitiri camaari, aisati ipincatsatashijeitaro yovetsicayetiri: oroyetatsiri, peratayetatsiri, otsipa ashroyetatsiri, mapitatsiri, inchatoyetatsiri, maaroni. Ijitasorentsitashiyetaro, iro cantaincha tecatsi oncantea amene, onqueme, aisati aniite.

²¹ Icantani yoayeriti, imatsitanti, yantiro caari yai, icoshiti. Te inquenqueshiretimateaji catsini.

10

Ora sanquenarentsi quenquetsatacotirori timayetatsineri, coajica.

¹ Impoiiji noneaqueri itsipa inampire Tasorentsi, shintsitasanotatsiri. Iponeaca inquitequi, oshoncacari mencori, itimaque savirentsi iitoqui jenioqui. Ivoro oshiaqueri catsirincaiteri, ivori oshiaquero paamari.

² Yajiriquiro sanquenarentsi, pinaicareachari. Iitisanori aaticajatapairori incajare, irointi irampate aaticapairori quipatsi. ³ Antearojenca icajemapaaque, iquempetacari maniti icajemi, jan, jan. Impoiiji itireanaque, icarataque 7, tiiriririri. ⁴ Noquemantacariri itireanaque, irotaintsi nosanquenateme, iro cantaincha noquemaqueri icantaquena inquiresati:

—Eiro pisanquenatirotsi icantiri tireatsiri, pimanero.

⁵ Ari noneajiri aisati inampire Tasorentsi, yora aatiquirori incajare aisati quipatsi: yovanquiro iracosanori inquitequi, ⁶ icanti:

—Timatsi Tasorentsi aneasanotatsiri, icantani yanei, eiro icamitsi catsini. Yovetsicaquero inquite aisati maaroni timantajeitarori; yovetsicaquero quipatsi aisati maaroni timantajeitarori; yovetsicaquero incajare aisati maaroni timantajeitarori. Ioti iriori te nontseeyaji, irotaintsi

meeca omoncaratea. ⁷ Impoiiji intiote yora inampire Tasorentsi, yora sietetapaintsiri. Ari onconijatapaaque manavetachari peerani: oca yoame-tiriri Tasorentsi quemisantajeitiriri peerani, yora quenquetsatacojeitiriniri.

⁸ Impoiiji noquemajiri aisati jenoquisati quenquetsatacaaquenari incaranqui. Icantana:

—Pijate, paavaquero sanquenarentsi yajiriquiri nampirentsi aatiquirori incajare aisati quipatsi.

⁹ Irosati nojatashitantacariri, nocantapairi:

—Pimpenaro sanquenarentsi.

Icantavaquena:

—Jero, payero, poyearo; ariorica poaquearo, pineaquero opochati, oquempetaca ija pitsi. Iro cantaincha impoiiji ompianeentaquempi.

¹⁰ Ari naavaquero, noacaro. Opochavetaca, iro cantaincha impoiiji opianeentaquena. ¹¹ Impoiiji icantaquena:

—Meeca pinquenquetsatacoteri aisati jaoca incantajeiteari coajica pashinipee atiri: nashiyetarori irineanepee, pincatsaripee, maaroni.

11

Iquenquetsatacotiri apite quenquetsatacantat-siri.

¹ Impoiiji ipaquenaro Tasorentsi inchaqui, shi-irori cotiquiironstsi, impoiiji icantaquena:

—Jero oca pimoncaramentoca. Pijate meeca novancoqui, pimoncarataitero; aisati pimoncaratero itaantarori casancapatsari, aisati pimoncarajeiteri maaroni quemisantajeitatsiri

anta, jaocarica icarajeitiri. ² Eiroyea pimoncaratirotsi anta saiteriqui: irointiquea pimoncarate onta iquenantari caari quemisantajeitatsi. Incarataque 42 cashiri inquenayetanaque itsipapee atiri anta nonampiqui: ora Jerosare. Oshequi iroashinoncaajeiteri savicajeitatsiri. ³ Nontianqueri apite quenquetsatacotenaneri, oncarate 1,260 quitaiteri inquenquetsatapinite. Incantapinijeiteri atiri: “Pinquenqueshirejeitanaquea. Eiro papiitapinitirotsi caari cameetsatsi, irointi pinquemisantajeite, pintimajeite cameetsa”.

⁴ Iquenquetsatacotitacarini peerani Sacariashini yora apitetatsineri, ishiacantaqueri orivo. Aisati ishiacantaquero onantari veera timatsiri anta Avincatsaritequi. Tempa iriotaque pincatsariventajeitiriri maaroni atiri.

⁵ Intimerica coavetachaneri iroashinoncayerime yora apitetatsineri, omponeaquea ivantequi iriori paamari, ontsoncasanojeiteri, ontaajeiteri, pomein. ⁶ Oshequi irimatacaajeiteri Tasorentsi.

Peerani inquenquetsatapinite, iro cantaincha incoaquerica eiro oparii incani, eiro opariitsi, irosati irivecarantearori inquenquetsate. Aisati, incoaquerica, impeajero nija irajantsi. Aisati incoaquerica, iroashinoncaapinijeiteri maaroni savicajeitatsineri. ⁷ Ariorica irimoncarataquero inquenquetsate, jeri aisati imponeaquea omoroqui tsoinpoina covencatatsiri iriori. Inquisapeeri quenquetsatatsineri, iranaacotapeeri, iroapeeri, shemi. ⁸ Imponaajeitaquea camajeitatsineri anta Jerosarequi, nianqui. Ishiacantaquero Tasorentsi Jerosare Soroma

aisati Ejipto; iro ishiacantantarori, oshequi yantapinijeitiro jerosaresati caari cameetsatsi. Tempa aitaque ipajacoyeetaqueriri Jesoshi Jerosarequi. ⁹ Oncarate mava quitaiteri imponaajeite nampitsiqui nianqui, irosati intampaticatantajeari catsirincaiteri aisati. Impocajeite maaroni atiripee iramenajeiteri camaintsineri, irinashijeitanaquea amenajeiterineri: imponeaquea otsipapeequi nampitsi, onashiyetaquea irineanepee. Eiro ishinetiritsi intijeeteri. ¹⁰ Inquimoshirejeitanaque maaroni savicajeitatsineri, iro inquimoshiretanteari incamaque yora apite quenquetsatacaajeivetearineri: impashitavacaajeitea paitapeerica. Incantajeite:

—Tsame anquimoshirejeite. Camanirotaque yora quenquetsatacotiriniri Tasorentsi: eiro imatajirotsi iroashinoncaajeitajee aisati.

¹¹ Iro cantaincha tampatica catsirincaiteri intasoncajeri Tasorentsi, intinaajeitajeri apite, incatiajeitanaje. Ari intsaroacaajeitanaqueari maaroni neajeitajerineri. ¹² Impoiji inquemaqueri Tasorentsi, antearojenca incanteri:

—Caatanaje aca jenoqui.

Ari irijajeitanaque inquitequi, inquenantanajearo mencori; irineajeitavajeri maaroni quisajeivetariniri. ¹³ Irosati onicantanaquea quipatsica, ontireaarantanaque pancotsipee. Incarajeite camajeitaintsineri 7,000. Oshequi intsaroajeitanaque itsipapee, impoijiquea impincatsajeitaqueri, icantajeite:

—Tempa oshequi ipincatsariti Tasorentsi, itasorentsitanoti.

¹⁴ Irootaque omoncaratanteari apitetapaintsiri iroashinoncaajeiteri Tasorentsi atiripee. Apanivaniji ora mavatapaintsineri.

Moncarataca ipincatsariventanti Tasorentsi.

¹⁵ Impoiji itiotaque yora itsipa inampire Tasorentsi, yora sietetapaintsiri: tii, tii, tii. Noquemajeitaqueri savicajeitatsiri inquitequi, antearojenca icantajeiti:

Meecaquea impincatsariventajeiteri Avincatsarite maaroni quipatsisati, incarateri Quirishito impincatsariventantajeite, incantaitiyempani.

¹⁶ Impoiji yora 24 savicacaajeitantatsiri iponeaca ivincatsarimentoqui, irosati itiyeroashijeitantacariri Tasorentsi: oshequi ipincatsajeitaqueri. ¹⁷ Ipampoyeaventajeitiri: Avirotaque, Novincatsarite, Tasorentsisanori: oshequi pishintsitaque, oshequi pipincatsaritaque.

Te pimpashinitapiniteaji, picantani pitasorentsitaque.

Aisati pipincatsaritanotaque, meeca pimpincatsariventajeiteri maaroni atiri;

eiro pojocajirotsi, irosati pincanteani.

Irootaque nopasonquijeitantimpiri.

¹⁸ Iquisajeivetimpi atiripee, iro cantaincha meeca pipiajeitacari.

Poitinaajeitajiri camajeivetainchari, maaroni:

pipinajeitaqueri maaroni antaveetimpirori picoacaajeitaqueriri, maaroni quenquetsatacojeitimpiri, quemisantajeitimpiri, maaroni.

Pincatsajeitimpiri, pincatsariveitachaniri quipatsiqui, caari pincatsariveitachani, maaroni.

Cameetsa pisavicacaajeitaqueri pinampiqui.

Irintiquea yora quisajeitimpiniri, caari cameetsajeitatsini, poasanquetaajeitaqueri, pitiancajeitaqueri Sharincaveniqui.

¹⁹ Impoiiji ashitareanaca ivanco Tasorentsi anta inquitequi, noneaquero tsoompoina cajo, ora onantari isanquenare Tasorentsi peerani. Aisati noneaquero yamatsequi, matsec, matsec; aisati antearojenca itirei, tiiriririri; aisati onicanaca quipatsi, shique, shique, shique; jero aisati opariitasaanotaque iriniqui, sacorororo.

12

Iquenquetsatacotaqueri Quirishito aisati yora maranquetatsiri.

¹ Impoiiji otimi aisati noneaqueri anta inquitequi, ishiacantaqueeneri aisati Tasorentsi, ayotan-teari irantayeteri coajicani. Noneaquero tsinane, oquempetaca oquitsaatacari catsirincaiteri, aaticaqueri cashiri, amatseetacari 12 impoquiro.

² Otsomontetaque, irotaintsi intime, atsicaneentaquero, ocavintsaanaca, ocajemanaque:

—Ayavee, ayavee.

³ Imapocaquero, ipocapaaque anteari maranque, catsini; quitioncaitaque ini. Ocarataque iito 7, aisati itseequi 10. Yamatsee yetaca iitopeequi. ⁴ Irishi inoshicaarantapaaqueri oshequi impoquiro catsini, sorororo; impoiiji ipishoncajeitaqueri quipatsiqui. Icatiapaaca anta otiminta

tsinane, yoyeaquero ontimeri otomi, iroantavaqueariri. ⁵ Ari otimiri otomi, yora pincatsariventasanojeiterineri maaroni atiri; tecatsi piatearineri coajicani. Imapoquiri Tasorentsi, yaapitsatanaqueri jananequi, yaanajiri inquitequi, isavicacaapaqueri ivincatsarimentoqui. ⁶ Oshianaca tsinane anta caaraiteriqui, anta yovetsicaqueneronta Tasorentsi. Ishentaquero anta cameetsa, ocarataque 1,260 quitaiteri.

Imanatavacaajeitaca anta inquitequi.

⁷ Jero aisati imanatavacaajeitaca anta inquitequi. Yora Miyeri, icarajeitaqueri itsipapee inampire Tasorentsi, iquisajeitavaqueri yora maranque aisati inampirepee iriori; imanatavacaajeitaca. ⁸ Irio anaacotantatsiri inampirepee Tasorentsi, yojocajeitaqueri maranque aisati icarajeitiri, tecatsi incantea iriori impiajeitanaje inquitequi. ⁹ Ari yojocasanojeitaqueri quipatsiqui, aisati maaroni inampirepee. Iriotaque yora maranquetatsiri peerani: ivincatsarite camaari, aisati ipajiyeetiri Satanashi. Peerani oshequi yamatavijeivetacarini atiripee, iro cantaincha eiro imatajirotsi aisati. ¹⁰ Impoiiji aisati noquemaqueri inquiresati, antearojenca icanti:

—Meeca yoavisacotasanojeitaquee Tasorentsi, itasoncacoventajeitaquee, ipincatsariventajeitaquee; aisati iriori Quirishito ipincatsariventajeitaquee. Cameetsataque. Icantani peerani icantacojeitaquee Satanashi, aisati maaroni ayemisantaririnte, icoapinivetaca

iroasanquejeiteeme Tasorentsi: icantani, quitaiteriqui, tsiteniriqui. Meecaquea eiro imatajirotsi Satanashi aisati. ¹¹ Icamimentajeitaquee Ovisha, aparajatimentajeitaquee iriraja, irootaque caari imatantajaro Satanashi iroasanquetacantajee. Aisati aquemisantasanojeitaqueri Tasorentsi, antajeitaqueneri maaroni icoacaajeitaqueeri, irootaque caari yoasanquetantajeitee. Ainiro acarajeitaqueri camimentiriri Quirishito, te incoyeni inquempoyeempa irisati. ¹² Meeca aquimoshirejeitaque, acarajeitaqueri maaroni savicajeitatsiri aca inquitequi; ancanteani anquimoshiretasanojeitanaque. Iro cantaincha irashinoncaasanojeitanaquea maaroni quipatsisati. Oshequi iquisa Satanashi, ioti eiro osamanititsi irisavique quipatsiqui, oshequi iroashinoncaajeiteri savicajeitatsiri.

Yora maranque iquisaquero tsinane.

¹³ Ari ipariapaaque maranque quipatsiqui, oshequi iquisapaaquero tsinane tomintariri otomi. ¹⁴ Itasonquiro Tasorentsi otimantacari oshivanqui apite, oquempetacaro ishivanqui anteari paquitsa. Impoiji arapitsatanaqueri maranque, ojataque anta ocaaraiteapai. Anta intacoyeetacaro icarataque 42 cashiri. ¹⁵ Impoiji yora maranque yaparajataquero oshequi nija catsini, oponeanaca ivantequi, chararara; icoaveta irooncajerome quipatsi, icoaveta areetapeemparome tsinane, ompiincaqueme. ¹⁶ Iro cantaincha ocavintsaquero quipatsi tsinane, otencareanaque, oquijatanaque maaroni nija quipatsiqui. ¹⁷⁻¹⁸ Aiquero ijatatii

iquisaquero tsinane. Te irimateroji iroori, irootaque ijatashitantariri itsipapee otomipee: maaroni yora antiniriri Tasorentsi icantaqueriri, aisati maaroni quemisantasanotiriri Jesoshi; icoaveta intsoncajeiterime iriori.

13

Ari iquenquetsatacotaqueri covencatatsiri.

¹ Impoiiji nocatiaca impanequiqui, anta otsapijaqui antearoja incajare. Jeri noneavaqueri incajarequi icontetapaaque covencatatsiri, otimi itseequi 10, jero iito 7. Otimi itseequiqui amatseerentsi; aisati isatoncaataca iitopeequi: ocanti-matiri sanquenarentsi Tasorentsi. ² Ari ishiapaaqueri maniti. Iiti oshiaquero iiti meeni; irointi ivante oshiaquero ivante maniti. Icantavaqueri maranque:

—Meeca nocoaque nomatacayempi, pinguempetantenari: oshequi pimayetaque, oshequi pimpincatsaritanaque, oshequi pincantacantayete.

³ Amashitanotaca catsini iito aparoni, naamaaca irovetaincha oamayerime amashitaqueriri. Yoajeitanaqueri cavaco maaroni atiri, icantajeiti:

—¿Paitaquea caari icamanta? Pamenerote iito, jooo, ¿paitaquea oaqueriri?

⁴ Aisati ipincatsajeitaqueri maranque, icantajeiti:

—Pineaqueri, oshequi imatacaqueri covencatatsiri.

Aisati ipincatsajeitaqueri covencatatsiri, icantajeiti:

—Pineaqueri, oshequi ishintsica, tecatsi materine impiateari.

⁵ Impoiji yora maranque icantiri covencatatsiri:

—Meeca pinquisanaqueri Tasorentsi, incarate 42 cashiri pimpincatsaritanotanaque.

Ari oshequi ishemetsataque, oshequi icantimataqueri Tasorentsi. ⁶ Ari icantimataquero inampi, aisati icantimajeitaqueri savicajeitatsiri anta. ⁷ Aisati icantaqueri maranque:

—Pinquisajeiteri maaroni quemisantajeitiriri Tasorentsi, poashinoncaajeiteri. Aisati pimpincatsariventajeiteri savicajeitatsiri quipatsipeequi, pashiniyetirori irineanepee.

⁸ Aitaque impincatsajeiteri maaroni atiripee. Apatiroquea irinti quemisantatsiri, eiro ipincatsatiritsi. Aitaque, tequerani irovetsiqueroni quipatsi, iotitacarini Tasorentsi maaroni quemisantajeiterineri. Aitaque isanquenataqueroni ivajiropee, ipajititayetacarini yora Ovisha camimentajeiterineri.

⁹ Otimirica piquemantari, pinquenqueshiretero oca nosanquenataquempiri.

¹⁰ Icanti Tasorentsi: “Noiminqueajeiteri coajica maaroni oiminqueajeivetaquempineri. Nompesajeiteri maaroni pesajeivetempineri”.

Meeca icoacaajeitaquee Tasorentsi ancantaitatitempani anquemisantajeiteri, anquearioventero.

Imquenquetsatacotaqueri itsipa covencatatsiri.

¹¹ Impoiji noneaqueri itsipa covencatatsiri, iponeaca irinti quipatsiqui tsompoina. Iquempevetacari ovisha, otimi itseequi apite;

icovencati ineanati. ¹² Oshequi ipincatsaritaque, iquempetacari itsipa covencatatsiri, yora amashitachari iitoqui. Aisati icantajeitiri maaroni savicajeitatsiri:

—Pimpincatsajeiteriyea yora amashitachari iitoqui.

Ari ipincatsajeitavaqueri. ¹³ Oshequi itasoncantayetaque yora apitetapaintsiri. Imayetaquero caari ineapinijeiti ashanincapee. Ineajeitaqueri atiri yoariaquero paamari: oponeaca inquitequi, irosati quipatsiqui. ¹⁴ Oshequi imayetaque, irootaque yamatavijeitantacariri oshequi atiri, ijitasorentsijeivetacari. Ariorica itsipatacari yora jivatiriri, oshequi imayetaque. Aisati icantajeitaqueri atiri:

—Jentsite, pishiacantajeiteri yoca jivataquenari, yoca ipesheevetacari. Pineaqueri, te incameji.

¹⁵ Ari iquemisantajeitaqueri, yovetsicajeitaque ishiacantaro. Impoiji itasoncaquero, aneantacari, aisati oneanatantacari. Impoiji icantajeitaqueri atiri:

—Pimpincatsajeitero oca avetsicajeitaqueri: irootaque atasorentsise.

Ari ipincatsajeivetacaro. Irintiquea maaroni caari pincatsatiro, yoacantajeitaqueri. ¹⁶ Aisati isatoncaatacantaqueri atiripee, maaroni. Isatoncaajeitaca iracosanoriqui, ariorica ivancainaqui, maaroni: pincatsarijeitatsiri, caari pincatsarijeitatsine, ashitaarantajeitachari, caari ashitaarantajeitachane; yora yamananteetiri aisati yora caari yamananteeti: isatoncaajeitaca maaroni.

¹⁷ Iro isatoncaajeitaqueriri ivajiro covencatatsiri,

yorari itsipapee isatoncaajeitaqueri inomerote.
Icantajeitiri:

—Eirorica isatoncaajeita atiripee, eiro noshine-
tiritisi iramanantayete aisati impimantayete.

¹⁸ Ocameetsati meeca ontime piotanteari,
pinquengueshiretero inomerote covencatatsiri.
Irootaque inomerote atiri, ocarataque 666:
irootaque piotanteariri.

14

*Iquenquetsatacotaqueri Ovisha aisati yora
pampoyeaventajeitiriri.*

¹ Impoiiji namenanaaji aisati, jeri noneaqueri
yora Ovishatatsiri, icatiaca toncaariqui
pajitachari Sio: otimi Sio Jerosarequi.
Icarajeitaqueri maaroni quemisantajeitatsiri,
satoncaajeitachari ivancainaquu ivajiro
Ovisha aisati iriri. Icarajeitaque 144,000.

² Impoiiji noquemajeitiri aisati inquiresati,
antearojenca irineane; iquempetacaro
antearoja ovarijare, aisati antearo itirei.
Iriojeitaque javioquijeitirori shiirori ijavioqui.

³ Itimajeiti anta Tasorentsiqui, anta itiminta
savicacantayetatsiri aisati yora itsipasati virantsi.
Ari ipampoyeajeitiro pampoyeantsi iroaquerari;
ocameetsajencataque, iro cantaincha tecatsi
materone iriotoero: apaniro irinti 144,000 atiri
oavisacojeitainchari.

⁴ Te irantajeitajeroji
caari cameetsatatsi iriori, icameetsajeitaque:
aisati icantani yojajeitaqueri ovisha, jaocarica
ijayetaqueri. Iriojeitaque quemisantajeitiriri
Tasorentsi aisati Ovisha. ⁵ Te intseeyajeiteaji,

aisati icameetsajeitaque, te irantajeitajeroji caari cameetsatatsi.

Irotaintsi iroasanquejeiteri Tasorentsi caari quemisantiri.

⁶ Impoiji noneaqueri itsipa inampire Tasorentsi, yarayetanaque inquitequi nianqui. Iquenquetsatacaajeitaqueri maaroni savicajeitatsiri quipatsiqui, jaocarica otimayetiri inampipee, aisati jaocarica ocantayetari irineanepee. Icamantajeitaqueri jaoca incanteari iroavisacojeitantajeari. Irootaque icantapinijeitiriri Tasorentsi maaroni atiri peerani, te impashiniteroji. ⁷ Antearojenca icanti:

—Pimpincatsajeiteri Tasorentsi, pincantajeiteri pishaninca: “Icameetsataque Tasorentsi”. Pamene, moncarataca meeca iroasanquejeiteri maaroni caari quemisantajeitiri. Pimpincat-satasanojeiteri: tempa iriotaque vetsiquirori inquite aisati quipatsi, incajarepee aisati nijatenipee, maaroni.

⁸ Yojatanaqueri itsipa nampirentsi, icanti iri-ori:

—Peerani yora savicaveitachaniri Vavironiaqui yantacaapinijeitaquerini itsipapee atiri caari cameetsatatsi, iro cantaincha meeca ipoyereajeitaqueri Tasorentsi vavironiasati. Eiro imatacaajeitajiritsi aisati paitapeerica.

⁹ Impoiji yojatajiri itsipa nampirentsi aisati: yora mavatapaintsiri. Antearojenca icantapaaque iriori:

—Queariompia, pipincatsatiricari yora covencatatsiri, aisati ora ishiacantaro. Aisati pishinetaricari irisatoncaatempipi pivancainaqui,

ariorica pacoqui. ¹⁰ Ariorica pimpincatsateri covencatatsiri aisati pishinetearirica irisatoncaatempí, ari inquisaquempi Tasorentsi; inquisasanotempí, eiro icavintsaimatimpitsi. Pinquematsicatanotaquearo paamari, irineajeitempi maaroni inampire Tasorentsi aisati yora Ovisha. ¹¹ Pincantaitatitempani pinquematsicatearo paamari; eiro otsivacanetitsi, oncantaqueani: quitaiteriqui, tsiteniriqui, peerani catsini. Aitaque inquematsicajeitearo maaroni pincatsatiriri covencatatsiri aisati ishiacantaro, aisati maaroni satoncaajeitarori ivajiro. ¹² Pamene, ariorica pantapinitiro maaroni icoacaimpiri Tasorentsi, aisati ariorica piquemisantsanotaqueri Jesoquirishito, eiro pishemarotsi; ariorica pinquematsicatimentearo, iro cantaincha eiro patsipetashitarotsi.

¹³ Impoiji noquemaquero aisati Ishire Tasorentsi anta inquitequi, ocantaquena:

—Jero oca pisanquenateri: “Inquimoshire-tacayeari Tasorentsi maaroni camajeitatsiri, iquemisantirinirica Ivincatsarite. Queario, inquimoshiretacaasanoteari Tasorentsi, tempa iotiro maaroni yantajeitaqueniri quipatsiqui; irisavicacaajeitaqueri cameetsa, irimaoreacaasanojeitajeri”.

¹⁴ Impoiniji namenanaaji aisati, jero noneaquero mencori, oquitamarotasanotaque. Aisati noneaqueri shiaqueriri Atiritapaintsiri, isavicaque mencoriqui. Yamatseetacaro iramatseere, vetsicachari oro. Aisati yajirica-
quero shiavetarori saviri, otsampitasanotaque.

¹⁵ Impoiniji noneaqueri itsipa nampirentsi,

iponeaca ivancoqui Tasorentsi. Antearojenca icajemacotaqueri yora savicatsiri mencoriqui:

—Moncarataca meeca pimpesacotero panquirentsi, sampataque meeca maaroni quipatsiquiniri. Pijate meeca pimpesacotero.

¹⁶ Ari ipesacojeitaquero savicatsiri mencoriqui, peti, peti; yaajeitaquero maaroni panquirentsi quipatsiquiniri. ¹⁷ Impoiiji iponeaca ivancoqui Tasorentsi anta jenoqui itsipa nampirentsi. Aisati yamaque iriori shiavetarori saviri.

¹⁸ Jeri ipocaque pashini aisati, iponeaca anta itaapinitironta casancapatsari. Iriotaque taarantirori paitapeerica. Antearojenca icajemacotaqueri ishaninca ajiriquirori isavirite:

—Iracaque ovapee: pimpesajeitero maaroni timajeitatsiri quipatsiqui, paayetajero maaroni, pampatotero.

¹⁹ Irosati ipesantarori maaroni ovapee anta quipatsiqui, yaayetajiro, yoajiro anta intsinacaitantarori Tasorentsi: ishiacantaquero inquisasanojeiteri coajicani Tasorentsi maaroni tseencajeitiriri. ²⁰ Ari oniri itsinacaitantarori anta oantsiqui, te ari one nampitsiqui. Ari oponeanaca itsinacaitantaroriqui oshequi catsini irajantsi, ooncanaca quipatsiqui; oquimojatanaque, areetacaro ivantequi cavayo. Otsoteanaquero irajantsi 320 quirometero: ojatanaque antoo.

15

Yaajeitaquero inampire Tasorentsi pajoqui oashinoncaajeiterineri atiri.

¹ Impoiiji noneaquero anta inquitequi itsipapee, ishiacantiro aisati timayetatsineri

coajica. Oshequi noquenqueshiretaquero, oshequi noanaquero cavaco. Noneaqueri 7 inampire Tasorentsi, oashinoncaajeiterineri atiri. Iriojeitaque vecarayeroneri maaroni oashinoncayerineri atiri; omoncaratapaaquea inquisanaquea Tasorentsi. ² Noneaquero aisati incajare, oshiaquero amenarontsi, oconoaro paamari. Noneajeitaqueri anta otsapijaqui icati-ajeitaca caari pincatsajeitiri yora covencatatsiri, jero aisati ishiacantaro; iriojeitaque maaroni caari satoncaatacha ivajiro aisati inomerote. Ari yajiricajeitaquero shiavetarori ijavioqui Tasorentsi. ³ Ipampoyeajeitaquero ivampoyeane Moishishi, yora antaveetiniriniri Tasorentsi. Aisati ipampoyeajeitaquero ivampoyeane yora Ovisha. Jero oca ipampoyeajeitaqueri:

Novincatsarite, tempa aviro Tasorentsi, oshequi pimayetaque.

Oshequi pitasoncantayetaque, noanaquero cavaco pantayetaqueri.

Ocameetsayetaque pantayetaqueri, te pamatavitananteji.

Queario, pipincatsariventajeitaqueri savicajeitatsiri maaroni nampitsipeequi, picantani.

⁴Tempa, Novincatsarite, ocameetsati nompincatsajeitempi, aisati iriori maaroni savicajeitatsiri.

Ocameetsati noncamantajeiteri atiri: “Icameetsati Tasorentsi”; tempa queario, picameetsataque.

Imponeajeitanaquea maaroni nampitsipeequi impincatsajeitantempiri.

Tempa iriojeitanaque ocameetsataque
pantajeitaqueri.

⁵ Impoiji namenanaaji aisati, noneaquero ashireanaca ivanco Tasorentsi, onta inquitequiniri. Noneasanotaquero anta ininta Tasorentsi. ⁶ Itimi pancotsiqui yora ⁷ inampire, yora oashinoncaajeiterineri atiri. Noneaqueri isoquijanaque. Iquitsaajeitaro quitsaarentsi tsivitamaori, oquitamaromaotasanaque. Ainiro inejiqui shiirori ishiticatsaqui, yovetsiqueetiro oro. ⁷ Aisati ainiro iriori aparoni virantsi, ipacojeitavaqueri nampirentsi aparopee pajo. Ojaaca pajoqui oja, oashinoncaajeiterineri atiri. Oshiacantaqueri inquisheru Tasorentsi coajicani tseencajeitiriri. Icantatiani yanei Tasorentsi, eiro icamitsi irinti catsini. ⁸ Oshequi ishiquairei, oshequi itasorenca; ainiro oyachaare, ojaacaro pancotsi. Tecatsi incanteetero inqueajeitero pancotsi, irosati irimatantearori nampirentsi icantaqueriri Tasorentsi.

16

Jaoca ocantari timatsiri pajoqui.

¹ Impoiji noquemaqueri ineanataque anta ivancoqui Tasorentsi. Antearojenca icantiri yora ⁷ inampirepee:

—Meeaquea pijajeite pisacotero quipatsiqui oja pajoquiniri, irootaque shiaquerori iquisaca Tasorentsi.

² Irosati ijatantaca yora jivatatsiri. Isacotaquero quipatsiqui oja, irosati isompojeitantanaca maaroni satoncaajeitarori ivajiro covencatatsiri,

aisati maaroni pincatsatirori ishiacantaro. Jo, oshequi isompyetanaque; opatsayetanaqueri, ishitiyetanaque. ³ Impoiiji ijataque apitetaintsiri, isacotiro oja anta antearojaqui incajare. Opeanaca, oquempetacaro irirajani camaintsiniri. Icamajeitaque timajeivetachari: shimapee, omanipee, maaroni. ⁴ Impoiiji ijataque mavatapaintsiri nampirentsi, isacotiro pajoquiniri anta enipeequi aisati nijatenipeequi. Opeajeitanaca irajantsi. ⁵ Impoiiji icantiri:

—Tasorentsi, oshequi picameetsataque; picantani pitimi: peerani, irosati meeca. Ocameetsataque poasanquetaajeiteri maaroni yontapee, irineashiitetearta; ⁶ tempa iriojeitaque oajeitiriri quemisantajeitimpiri aisati quenquetsatacojeitimpiri. Meeca pipiatacoventajari, poajeitaqueri. Ineacarove iriori, tempa iriojeitaque oayeri.

⁷ Aisati itimi itsipa anta itaapinitironta casanpatsari. Icanti iriori:

—Queario, Novincatsarite, aviro Tasorentsi mayetirori maaroni. Ocameetsataque poasanquetaajeiteri, irineashiiteteartave: piotaquero poasanquetamentiriri.

⁸ Impoiiji ijataque itsipa nampirentsi aisati, yora itsipatatipaintsiri. Isacotiro pajoquiniri anta catsirincaiteriqui, imatantacariri itaajeitaqueri atiripee. ⁹ Ari itaajeitaqueri, irosati iquisatsajeitantariri Tasorentsi: yora tianquiriri oashinoncaajeitiriri. Te inquenqueshirejeiteaji. Te incoajeiteji irojocajero caari cameetsatatsi yantayetiri, aisati te incoajeiteji impincatsajeiteri Tasorentsi. ¹⁰ Impoiiji yora apapacorotapaintsiri,

isacotiro pajoquiniri anta ivincatsarimentoqui covencatatsiri. Irosati otsitenitananaca anta ipincatsaritinta. Oshequi icavintsaajeitanaca, irosati yatsicanenetantanaca. ¹¹ Oshequi iquisatsajeitaqueri Tasorentsi, iquishimentaro isompopee aisati maaroni iquemaatsicayetacari. Iro cantaincha te inquenqueshiretempaji, te incoajeiteji irojocajero caari cameetsatatsi yantajeitaqueri. ¹² Impoiji yora itsipa nampirentsi isacotiro ivajonequiniri anta antearojaqui eni pajitachari Eojarateshi, irosati opirijatasanotantanaca, pirijaiteni. Meeca tecatsi ticajeitavaquerine yora pincatsaripee jivajeiterineri maaroni isorarotepee. Imponeajeitanaquea anta iquenapainta catsirincaiteri. ¹³ Impoiji noneaqueri aisati yora maranque, yora covencatatsiri, aisati yora amatavitantatsiri; iponeajeitaca ivantepeequi mava camaari, ishiapaaqueri mashero. ¹⁴ Queario, icamaaritananotaque; itasoncantanirovetaca, imayetaquero caari aneapinijeiti. Ijatashijeitiri maaroni pincatsaripee, icantajeitiri:

—Tsame ancarajeitavacayea, amitacotava-caajeitea amanajeiteri maaroni oijajeitiriri Tasorentsi, antsoncajeiteri, maaroni.

Ja, ariorica impocapaaje Tasorentsi, yora matirori maaroni, irimanatavacaajeitea iriripee. Inquemacojeitero maaroni atiripee irantayetapaaqueri Tasorentsi. ¹⁵ Incantapaaque:

—Pamene, oquempetaca coshitantatsiri imapouquiri yora icoshitiri, aisati narori, nomapocajeitapaaquempi. Te piojeiteji jaocarica oncarate nompocantajeari. Nonquimoshiretacaajeitajeri

maaroni aamaajeitanari, quempetarori isaaquiti. Nocoaque incameetsajeitanaque, eiro yantapini-tirotsi caari cameetsatatsi. Inquempetacantea iquitsaata cameetsa, tecatsi neatsempequiterine eiro ipashiventantaja.

¹⁶ Iro cantaincha yora camaaripee yapatojeitaqueri maaroni soraropee anta nampitsiqui ipajitiri jorio Aramaqueroni.

¹⁷ Impoiji yora nampirentsi sietetapaintsiri: yora caratapaintsiri. Isacotiro ivajonequiniri anta tampeaqui, irosati noquemantacari timatsiri anta ivancoqui Tasorentsi, savicatsiri ivincatsarimentoqui. Antearojenca icantaque:

—Moncaratapaaca, aitapaji.

¹⁸ Impoiji oshequi iporequi, porec, porec; aisati antearojenca itirei, tiiririri. Aisati antearo catsini onicaca quipatsi. Te aneapiniteroji quempetearoneri oca. Antearo onicaca catsini: nica, nica, nica, nica. ¹⁹ Irosati oporocajeitantanaca maaroni pancotsipee anta Vavironiaqui, aisati maaroni otsipapeequi nampitsi, otsoncajeitaca maaroni, poyere. Iquenqueshiretaquero Tasorentsi maaroni yantajeitaqueniri vavironiasati, irootaque iquisasanojeitantacariri, yoashinoncaasanojeita-queri. ²⁰ Opeajeitanaca maaroni ovoyejapee; aisati otshipee, opeajeitanaca, maani. ²¹ Jero aisati opariaque iriniqui, iro cantaincha antearo onasanotaque catsini. Otenataque apaitsoquironi 40 quiro. Oponeaca inquitequi, opariaque atiriqui, oshequi otsoncajeitaqueri. Oshequi itsaroacaajeitacaro iriori, irosati iquisatsajeitantariri Tasorentsi.

17

Iquenquetsatacotiri vavironiasati, irashinon-caajeitanaquea, coajica.

¹ Impoiji ipocashitaquena aparoni nampirentsi, sacotirori pajoqui. Icantaquena:

—Caatanaque aca: nonijayempiro jaoca incanterori Tasorentsi ora antajeitiriri shirampari, savicatsiri enipeequi, jero nijateenipeequi. Iroasanguetayero. ² Yantajeitaquero ivincatsaritepee it-sipapee atiri. Oamejeitaquero maaroni atiri yantapinitiro caari yai.

³ Impoiji yaanaquena anta caaraiteriqui, otimi anta onijaquenari Ishire Tasorentsi. Noneaquero tsinane, oquijacotacari covencatatsiri, quitioncatatsiri: otimi 7 iito, jero itseequi 10. Isatoncaayetaca ivatsapeequi: ocantimatiri Tasorentsi isatoncaaro. ⁴ Oquitsaatacaro

tsinane quiraanirori aisati quitioncari. Oaneencayetacaro oro, jero mapi shipaquireatsiri aisati quitamaroquiri. Ajiriquiro

otsotane, yovetsiqueetiri oro; ojaacaro caari cameetsayetatsi, oshiacaventiro antacaajeitiri atiri iquemisantashitaro yovetsicane atiri aisati oamejeitiri imayempitanti. ⁵ Osatoncaataca

ovancainaqui: ainiro oshiacantayetaqueeri, iro cantaincha tequera onconijatasanote. Ocanti: “Antearo oni Vavironia, irootaque oamejeitirori tsinane antayetiri caari ai. Irootaque

oamejeitiriri oshequi atiri iquemisantashitaro yovetsicashiyetari”. ⁶ Impoiji niotaquero

oshinquitaca tsinane. Iro oshinquitacari irirajani quemisantaveitariniri Jesoshi

oajeitaqueri. Oshequi noanaquero cavaco, namenasanotaquero, sorererere. ⁷Iro cantaincha isampitana inampire Tasorentsi:

—¿Paitaquea poantarori cavaco? Noncaman-tempiro caari piotitiro, aisati noncamantempi caari piotitiri yora covencatatsiri oquijacotacari. ⁸Itimaveitani yoranqui, te aneeriji meeca, itimi meeca omoroqui tompoina, jatatsiri antoo. Coajica iraajeri aisati Tasorentsi, intiancanteariri Sharincaveniqui: anta incantaitiyempani irashinoncayea. Itimaveitani, ipeaca, intimaje aisati; ariorica irineajeitavaqueri tseencajeitatsineri, iroajeitavaqueri cavaco. Peerani, iroaquerani yovetsiquiro Tasorentsi quipatsi, isanquenatiro ivajiropee maaroni jatatsineri inquitequi, iro cantaincha te irisanquenateroji ivajiropee yora tseencantatsiri. ⁹Pinquenqueshiretasanotero oca noshiacantempiri piotantearori: ora iitopee caratatsiri 7 oshiacaventiro 7 toncaaripee osaviquinta tsinane. ¹⁰Aisati oshiacaventiri 7 pincatsaripee. Icamanaque apapacaroni, itimi meeca aparo, coajica intime yora caratapaintsineri. Eiro osamanititsi impincatsariventante yora caratapaintsineri. ¹¹Yora covencatatsiri, iriotaque aparoni pincatsariveitachaniri nocantaquempiri: “Icamaque”. Iro cantaincha intinaanaje aisati, impincatsariventantaje aisati, impoiji irijate Sharincaveniqui. ¹²Aisati ora 10 itseequi pineajeitaqueri: oshiacantiri itsipapee pincatsarijeitatsine coajica. Incarajeiteri covencatatsiri, impincatsarijeivetanaquea, eiro osamanititsi impincatsariventante.

¹³ Inquempetavacaajeitea pincatsaripee, incantajeiteri covencatatsiri: “Nompincatsajeitempi avirori, nantajeitempiro paitarica pincoacaajeitenari”. ¹⁴ Impoi inquisajeiteri Ovishatatsiri, aisati oijajeitiriri: irimanajeiveteari, incoajeivetea intsoncajeiterime. Iro cantaincha impiajeiteari Ovishatatsiri, intsoncajeiteri irinti. Tempa iriotaque anaacojeitiriri pincatsajeitatsiri, ipincatsaritasanoti; iriotaque anaacojeitiriri maaroni savicacantantatsiri, maaroni. Icoyeajeitaqueri maaroni quemisantajeitiriri, ipashinitacaajeitajiri, ari quiso yoajeitanajiri iriori, maaroni.

¹⁵ Aisati icantaquena nampirentsi:

—Aisati pineaquero enipee aisati nijatenipee osavicantari tsinane. Oshiacantaqueri iriori maaroni atiripee savicajeitatsiri jaocaricapee, jaocarica ocantayetari irineanepee, maaroni.

¹⁶ Aisati itseequipee oshiacantaqueri atiripee quisajeitaquerori tsinane: ora antapinitiriri caari ai. Aisati inquempjeiteri yora covencatatsiri, inquisaquero iriori. Iroashinoncayero, irisapoquero, iroyero ovatsa, intayero.

¹⁷ Irio Tasorentsi quenqueshiretacayerineri inquisajeitero, irimatantearori icoiri iriori. Incantajeite: “Tsame ampincatsajeiteri yora covencatatsiri quitioncatatsiri, anteneri paitapeerica incoacaajeiteeri”. Aitaque incantajeiterori oca omoncaratanteari icantiri Tasorentsi iriori. ¹⁸ Oca tsinane pineaqueri oshiacantajeitaqueri maaroni savicajeitatsiri nampitsiquinta: yora anaacojeitiriri itsipapee atiri ipincatsariti.

18

Intime oshequi iracojeiterine vavironiasati.

¹ Impoiji noneavaqueri ipocapaaque itsipa in-
ampire Tasorentsi, iponeanaca inquitequi. Os-
hequi ipincatsaritapaaque, ishipaquireapaaque,
iquitaitetasanotapaaquero quipatsi, yatsioquin-
tapaaquena. ² Antearojenca icajemapaaque:

—Tsoncajeitaca ini maaroni savica-
jeiveitachaniri Vavironiaqui; oshequi
inajeiveitani, oshequi ipincatsariveitani, meeca
ipoyereajeitaca. Irio timapaajantsiri camaaripee
inampiniqui, mamaroniro, tsivaniniro, maaroni.
Iquempejeitacaro tsinane, antapinitiriniri
caari ai. ³ Te oncameetsaveiteani osavique,
aisati oamejeitaqueri maaroni itsipapee atiri
iquempejeitantacarori iriori. Yantajeitaqueroni
pincatsaripee; oshequi yaarantaque yora
pimantirori ovetsicane, caari cameetsayetatsi.

⁴ Impoiji noquemaqueri Tasorentsi anta jeno-
qui, icanti:

—Pisoquijajeitanaje, quemisantajeitanari:
piquempetarocari, pantirocari avirori caari
cameetsayetatsi antiri iroori. Picarajeitirocari,
noasanquetaajeiticari. ⁵ Oshequi catsini

antapinitiro caari cameetsatatsi. Eiro
nopeacotarotsi antayetaqueri. ⁶ Peerani

oshequi oashinoncaajeitaqueri itsipapee,
meeca pimpiajeitearo, aiquero pijatatiye
poashinoncaasanojeitero. Te oncameet-
sateji antajeitaqueri. ⁷ Peerani oshequi

oshemetaqueni aisati oshequi antashiyetacari
shiramparipee; meeca aisati onquempetea,

oshequi pineacatsitacayearo aisati oshequi poashiretacayearo. Oquenqueshirevetaca:

“Narotaque pincatsaro, te naro camajimentaaro, eiro noashiretatsi”. ⁸ Nomapocaquero

noashinoncaasanotaquero; oneaqueri oshaninca incamajeite, iracojeiteari, onquemero otashe; ontsonquero paamari. Tempa narotaque pivincatsarite, tempa naro Tasorentsi. Ainiro noshintsinca noasanquetantearori.

⁹ Yora pincatsaripee antayetirori aisati antavintsayetirori irineajeitero ontaayea, irineero oyachaare; impoiiji iriraacojeitero, iroashiretacotearo. ¹⁰ Areji incatiajeitanaque; intsaroajeitanaque, iramaaquea iroashinoncaajeiteri Tasorentsi iriori. Incantajeite:

—Oo, vavironiasati, pashinoncaajeitacave. Antearo onaveitani pinampi, oshequi picarajeiveitani savicajeiveitachaniri. Imapocaquempi Tasorentsi, itsoncajeitaquempi, maaroni.

¹¹ Ari iriraacojeitaquempi pimantajeitatsiri, iroashiretacojeitaquempi. Peerani oshequi pamanantajeiveitaroni paitapeerica ipayeveitimpiniri, iro cantaincha eiro meeca pamanantajitsi aisati. ¹² Tecatsi incantea

impimantempiro oro, perata, shipaquireatsiri mapi, quitamaroquiri mapi, tsivitamaori, quitioncaniromaori, quiripemaori, quiraamaori, inchato casancacotari, itseequi quitamarotseequiri isheronqueetiri, pinatachari inchato yovetsiqueetiri, ashiroyetatsiri, pinatachari mapi, ¹³ pochapaneri, conoavanetachari yoari, casancapatsari, casancajayetatsiri, ovaja, quejitsi, tirico, ovane tirico, vaca, ovisha, cavayo,

shiacomentotsi, atiri; queario, ipimantaniroyetiri atiri. ¹⁴ Incante:

—Eiro pojarotsi aisati chochoqui pinintaveitaniri; eiro otimimotajimpitsi aisati pivaararopee aisati poanencayetajeari: ontsoncaquea coajicani, poyere.

¹⁵ Yora pimantapiniveitaroniri maaroni oca vaararontsi yaantapiniveitariniri oshequi quireequi; iro cantaincha meeca incatiajeitanaque arejiqui, intsaroajeitanaque, iramayea aisati iroashinoncaajeiteri Tasorentsi iriori. Iiraanaquea aisati irishencatanaquea, jii, jii, jii. Incante:

¹⁶ —Oo, vavironiasati, pashinoncaacave. Antearo onaveitani pinampi, oshequi picaraveitani savicajeiveitachaniri. Piquitsaajeiveitaroni tsivitamaori, qutioncaniromaori, aisati quiraamaori, poanencajeiveitaroni oro, mapi shipaquireatsiri, jero aisati quitamaroquiri mapi. ¹⁷ Meeca imapocaquempi Tasorentsi, itsonquitaquempiro maaroni, poyere.

Aisati maaroni marinero aisati ashiyetarori pitotsi aapinitirori vaararontsi icatiacojeitaca ivitoqui, arejiqui. ¹⁸ Paricoti yamenacojeitaquero oyachaare, povaa, irosati iraajeitantanaca. Icantajeiti:

—Oo, ocameetsaveitani nampitsinta, te ontimeniji quempetearoneri.

¹⁹ Oshequi yoashirejeitanaca, irosati itijainatantaca quipatsi iitoqui. Oshequi iracojeitacaro aisati yoashiretacotacaro, icajemajeitanaque:

—Oo, pashinoncaajeitacave vavironiasati, antearo onaveitani pinampini, oshequi picarajeiveitani. Oshequi ojatapinitini antearo pitotsi anta, ipimantiro ashitarori oshequi ovaararontsi, yaantariri oshequi quirequi. Iro cantaincha omapocanaca otsoncanaca pinampi, maaroni.

Inquimoshirejeitanaque quemisantajeitatsiri.

²⁰ Impoiiji noquemaque icanteeti:

—Pinquimoshirejeitanaque, maaroni inquiresati: quemisantajeitatsiri, itiancanenipee Quirishito, camantantaveitachaniri, maaroni. Peerani oshequi oashinoncaajeitaquempi, irootaque ipiatacoventantaquempiri Tasorentsi.

²¹ Impoiiji noneaqueri inampire Tasorentsi, shintsitasanotatsiri. Yaaquero antearo mapi, ipishoncaquero antearojaqui incajare, pocn. Icanti:

—Noviincaquero mapi, opeasanotaca; tecatsi neajeroneri aisati. Aisati inquempyeetajero Vavironia, intsonqueetajero iroori, poyere; tecatsi neajeroneri aisati. ²² Ainiro

aquemapinivetari meeca javioquivetachari, pampoyeajeivetachari, shiovivetachari, voorerovetachari; iro cantaincha coajica tecatsi quemajerine. Ainiro inaveta meeca vetsicayevetarori paitapeerica, iro cantaincha coajica eiro itimajitsi. Ainiro aquemaqueri meeca tononquirori yoyeetari, tonon, tonon, tonon; iro cantaincha coajica tecatsi quemajerine.

²³ Eiro otsiotajatsi aisati itsiomento; eiro itimajitsi aisati aajantsine ijina. Peerani iotacojeitaqueri yora pimantayetatsiri anta

Vavironiaqui, oshequi ivioncaqueri iirequite. Yora savicajeitatsiri yamatavijeitaqueri itsipapee atiri, ²⁴ aisati yoacantajeitaqueri maaroni quenquetsatacotiriniri Tasorentsi, aisati maaroni quemisantatsiniri; irootaque impoyereantajeiteariri Tasorentsi maaroni vavironiasati.

19

¹ Impoiji noquemajeitaqueri oshequi catsini in-
quitesati, antearojenca ipampoyeajeiti:

Irove, icameetsatasanotaque Tasorentsi: irio-
taque oavisacojeiteeri.

Tsame ampincatsatasanojeiteri, tempa
itasorentsitanotaque.

² Ocameetsataque yoasanquetaquero antapini-
tiriri caari ai, iotaquero yantayetiri, tecatsi
incomitea.

Oshequi oamejeitaqueri itsipapee atiri yantiro
caari yai, irootaque yoasanquetantacarori;
tempa oneashiitetacarove.

Aisati oshequi oashinoncaajeitaqueri
quemisantajeitiriri, irootaque ipiatacoven-
tantacariri.

³ Impoiji yapiijeitajiro:

—Icameetsataque Tasorentsi. Otaasanotaca,
oncantaitatiyempani oncatiajencatanaque
cachaa, eiro opeatsi.

⁴ Ari isavicaque Tasorentsi anta ivincatsari-
mentoqui. Itiyeroashijeitacari yora 24 savica-
caantatsiri aisati yora apitesati virantsi, oshequi
ipincatsajeitaqueri. Icantajeiti:

—Aitaque ancantajeiteari ampincatsajeiteri Tasorentsi, tempa icameetsataque.

⁵ Impoiji itimi pashini inquiresati, itimi quempeji Tasorentsi, icanti iriori:

Pineacameetsajeiteri Atasorentsite, maaroni an-taveejitiriri,

aisati maaroni pincatsajeitiriri.

Pincatsaripee, pineacameetsajeiteri;

caari pincatsarivetacha, pineacameetsajeiteri avirori.

⁶ Impoiji noquemajeitaqueri oshequi catsini jenoquisati, antearojenca ineanajeiti, iquempejeitacaro oshequi ovarijare antearojatatsiri aisati iquempejeitacaro antearo itirei. Icantajeiti:

Icameetsataque Tasorentsi: ipincatsariventajeitaquee Avincatsarite, oshequi ishintsinca.

⁷ Tsame aveshireimentajeiteari, anquimoshireimentajeiteari maaroni.

Tsame ampincatsajeiteri maaroni.

Meecca omoncarataca irayero Ovisha ijina; vetsicaca ijinatsori.

⁸ Ishinetaquero oquitsaataro quiripemaori, cameetsatasanotatsiri, quitamarotasanotatsiri; te ompitsitimateji.

Ora quiripemaori oshiacantaquero cameetsayetatsiri yantajeitaqueri quemisantajeitatsiri.

⁹ Impoiji icantaquena nampirentsi:

—Jero oca pisanquenateri: “Irotaintsi iraye Ovisha ijina, aisati inquimoshireventearo, aisati icajemajeitiri oshequi atiri iroimojeiteari. Inquimoshiretasanojeitaque maaroni icajemajeitiri”.

Impoiji icantaquena:

—Oca nocamantaquempiri, irootaque icantasanotaquenari Tasorentsi.

¹⁰ Ari notiyeroashivetacari nampirentsi, nompincatsaterime, iro cantaincha icantaquena:

—Eiro pipincatsatanatsi. Tempa aquempetavacaajeitaca: narori, aisati avirori, jeri maaroni piyemisantaririnte quenquetsatacotapinitiriri Jesoshi. Aitaque aquempetavacaajeitaca antajetiniri icoacaajeitaqueeri. Eiro pipincatsatanatsi, irintiquea Tasorentsi pimpincatsate.

Yora quenquetsatacotiriri Tasorentsi, iriojeitaque quenquetsatacotiriri aisati Jesoshi.

Imanavacaajeitaca anta Aramaqueroqui.

¹¹ Impoiji noneaquero inquite tsoompoina, jeri noneaqueri cavayo quitamarotasanotatsiri. Ainiro quijacotacariri, ipajiyeetiri: Caari Amatavitantatsi; aisati ipajiyeetiri: Tampaticatatsiri. Icameetsataque: te iroasanquetashiteariri atiri, te iroashiteariri. Ioti paitarica yantiri, te inquisashiteariri.

¹² Iroqui oquempetacaro paamari amorequi, yamatseetacaro oshequi amatseerentsi. Isatoncaataca ivancainaquei ivajiro, iro cantaincha tecatsi ioterone; apaniro iotiro irinti.

¹³ Iquitsaatacaro ajacachari irajantsi; aisati ipajiyeetiri: Ashitarori Irineane Tasorentsi.

¹⁴ Impoijeitapaaqueri oshequi soraro jenoquiniri, iquijacojeitacari cavayo; iquitsaajeitaro quiripemaori, oquitamarotasanotaque, te ompitsiteji.

¹⁵ Otimi ivantequi jivajeitiriri ivesamento, tsaampitasanotatsiri impesajeitantariri caari

pincatsajeitiri. Impincatsariventasanojeiteri, eiro catsini icavintsaimatiritsi. Yora vetsiquirori ovaja yaaticasanotaquero ova yaajatantacarori oja. Aitaque inquempetaqueriri iriori, iraaticasanojeitaqueri atiri, iriojeitanteari iriori iquisasanojeitaqueri Tasorentsi, yora Shintsitasanotatsiri. ¹⁶ Osanquenataca iitsaarequi jivajeitiriri, aisati ivoriqui, ocanti: “Irio pincatsariventajeitiriri maaroni pincatsaripee, anaacojeitiriri maaroni savicacantajeitatsiri”.

¹⁷ Impoiiji noneaqueri aparoni inampire Tasorentsi catiainchari catsirincaiteriqui. Antearojenca icajemajeitaqueri maaroni tisonipee:

—Caate, poajeitea. Poajeiteari ivatsa impajeit-empiri Tasorentsi; timatsi oshequi poajeiteari. ¹⁸ Poyeari ivatsa pincatsari, ivatsa capitantatsiri, ivatsa savicacaantatsiri, ivatsa cavayo aisati yora quijacovetariri. Poyeari ivatsa maaroni atiri: pimantaari aisati amanantavetajariri, pincatsari-tatsiri aisati caari pincatsaritatsi.

¹⁹⁻²⁰ Aisati noneajeitaqueri yora covencatatsiri aisati maaroni yora pincatsaripee, yapatojeita-queri isorarotepee, maaroni. Aisati yojataqueri covencatatsiri yora atiri, cantavetachari: “Non-camantempi jaoca icantari Tasorentsi”. Oshequi itasoncantayevetaca, yamatavijeitantacariri caari quemisantajeitiri Tasorentsi. Isatoncaajaitaca ivancainaquei yora caari quemisantatsi. Ari ijatashijeivetacari irimanajeiterime yora quijacotacariri iyavayote aisati soraropee iriori. Iro

cantaincha yaavaqueri apite: yora covencatatsiri aisati yora amatavitantatsiri, tapi. Aneatsiquera, yojocaqueri anta antearoqui paamari. ²¹ Irinti itsipapee, ipesajeitaqueri yora quijacotachari, ipesajeitaqueri maaroni, peti, peti, peti. Iro ipesantacariri ivesamento ivantequiniri. Ari yoajeitacaro tisoni ivatsani, iquemasanotacaro.

20

Iquenquetsatacotiro 1,000 osarintsi.

¹ Impoiiji noneavaqueri yaniireapaaque itsipa inampire Tasorentsi, iponeanaca inquitequi. Yajiriquire iyavireantarori omoro quipatsi, jatatsiri antoo. Aisati yamapaaquero antearo carenatsa. ² Yaapaaqueri yora maranque, timitachari peerani. Icanteetiri camaari aisati icanteetiri Satanashi. Ari yoisotasanotapaaqueri, oiso, oiso; oncarataque 1,000 osarintsi iroisoreacotantajeariri aisati, coajicani. ³ Impoiiji yojocaqueri omorogui, yashitacotaqueri, iyavitacotaqueri. Tecatsi incantajea aisati iramatavijeitajeri atiripee, oncarataque 1,000 osarintsi. Iro cantaincha impoiiji irisoquijanaje, eiro osamanititsi iramatavitantaje aisati.

⁴ Impoiiji noneajeitaqueri oshequi savicajeitatsiri ivincatsarimentopeequi: iriojeitaque icantiri Tasorentsi: “Pincantacoventajeiteri maaroni atiri”. Peerani te impincatsajeiteriji iriori yora covencatatsiri aisati ishiantaro. Aisati te irisatoncaateaji ivancainaquei aisati iracoqui ivajiro covencatatsiri. Iquenquetsatacojeitaqueri Jesoshi aisati yoametantajeitiro irineane Tasorentsi, irootaque ipesanteetacariri

itsanoqui. Meeca itinaajeitanaja, incarajeiteri Quirishito, oncarataque 1,000 osarintsi impincatsariventantajeite. ⁵ Iro cantaincha tequera intinaajeitanaje itsipapee. Ariorica avisanaque 1,000 osarintsi, ari intinaajeitanaje maaroni. ⁶ Oshequi inquimoshirejeitanaque yora jivatasanojeitatsineri intinaajeitanaje: iroameetsatasanoteri Tasorentsi. Iriotanaque eiro ijatitsi Sharincaveniqui, irointi impincatsajeiteri Tasorentsi aisati Quirishito, aisati oncarataque 1,000 osarintsi incarajeiteri impincatsarijeitanaque.

Irivecaratantearori irimanatavacayea.

⁷ Ariorica omoncaratapaaquea 1,000 osarintsi, ari iroisoreajeri Satanashi, iroimisoquijajeri aisati. ⁸ Impoiji irijatanaque iriori maaroni nampitsipeequi, intsoteanaquero quipatsi, irampatojeitanteariri savicajeitatsiri irimana-jeitanteariri quemisantajeitatsiri. Icanteetiri yora oijajeitiriri Satanashi: Co, aisati Maco. Incarajeitanaque oshequi catsini. Oquempetaca te amateroji amoncarajeitero ovane impanequi, aisati eiro amatirotsi amoncarajeiteri irioripee, jaocarica incarajeiteri. ⁹ Inquenajeitanaque anta opampaitetinta, irishoncajeitanaqueari maaroni quemisantajeitatsiri, aitaque irishoncajeitaquero Jerosare: ora nampitsi anintajeitaqueri. Irimanajeitapaquerime quemisantajeitatsiri, iro cantaincha omapocanaquea omponeanaquea inquitequi antearo paamari, ontsoncajeitapeeri; ontaajeitapeeri, pomein. ¹⁰ Impoiji irayeeteri camaari, yora amatavijaitiriri atiri, irosati

irojocanteeteariri anta antearoqui paamari. Anta incarajeiteri yora covencatatsiri aisati yora amatavitantatsiri, cantavetachari: “Noquenquetsatacotiri Tasorentsi”. Ari oshequi inquemaatsicajeitearo: quitaiteriqui, aisati tsiteniriqui; incantaitatiyempani.

11 Impoiji noneaquero antearo ivincatsarimento, oquitamarotaque; aisati noneaqueri yora savicantarori. Opeasanotanaca quipatsi aisati inquite, maani. ¹²⁻¹⁵ Aisati noneaqueri maaroni piincajeivetachari incajarequi. Itinaajeitanaja tijajeivetachari aisati maaroni jajeitatsiri Sharincaveniqui. Queario, noneajeitaqueri: pincatsariveitachaniri aisati caari pincatsaveitachani, icatiimojeitacaro ivincatsarimento Tasorentsi. Impoiji ipenareetaquero oshequi sanquenarentsi. Osanquenajeitaca sanquenarentsipeequi maaroni yantajeitiniri atiripee. Ariorica ocameetsati yantajeitiniri, icanti Tasorentsi: “Nompinateri, cameetsa nosavicacayeri”. Terica oncameetsateji yantajeitiniri, icanti: “Noasanquetayeri yora”. Otimi otsipa sanquenarentsi aisati, ipenareetaquero. Osanquenataca irointi ivajiropee maaroni savicatsineri inquitequi. Yora caari sanquenatacotacha yojoqueetaqueri anta antearoqui paamari: anta yojoqueetiri maaroni tseencantatsiri aisati maaroni camaari. Ipajiyeetiro paamari Inampi Ashinoncaasanotachari: yora caari neajeitajerine Tasorentsi.

21

Iquenquetsatacotaquero Jerosare iroaquerari.

¹ Impoiji noneaquero pashini inquite aisati pashini quipatsi, iroaqueratajantsiri. Aitaque opeasanotanaca ora intacaroniri, aisati opeaca incajareni. ² Aisati noneaquero ora Jerosare iroaqueratajantsiri, ora cameetsatasanotatsiri, inampi Tasorentsi; oponeanaca inquitequi, aniireapaaque quipatsiqui. Oshequi oaneencayetaca, oquempetacaro tsinane, irotaintsirica aye ojime, oaneencaca.

³ Noquemaquero jenoquisati, timatsiri quempeji ivincatsarimentoqui Tasorentsi. Antearojenca icanti:

—Pamenajeite: ijataque Tasorentsi irisaviquimojeiteri atiri. Quiso iroajeiteri, irishanincajeitantariri. Eiro yojocajeitajiritsi.

⁴ Iriveshireacaajeiteari, eiro ishinetiritsi atiri iriraaajeitajea aisati; eiro icamajeitajitsi. Eiro iraacotajaritsi aisati camajantsineri, eiro ishencatajatsi, eiro iquematsicatarotsi paitapeerica. Aitaque ontsonqueari maaroni ocapee.

⁵ Impoiji icanti Tasorentsi:

—Pamene, noaqueratacaajeitero maaroni.

Aisati icantaquena:

—Pisanquenatero oca: queario nocantaquem-
piri, te namatavitempiji.

⁶ Aisati icantaquena:

—Moncarataca, nomataquero. Narotaque intacantarori maaroni, aisati narotaque vecarayeroneri maaroni. Intimerica miretatsineri, nompashiteari irireri; eiro

nocoacotiritsi: aitaque nompajeiteri maaroni coiteimojeitacariri. ⁷ Ariorica irantajeitenaro maaroni nocoacaajeitiriri, nompasanojeiteri maaroni coiteimojeitacariri. Nontasoncacoven-tapinijeiteri, aisati nontomintasanojeiteari. ⁸ Irintiquea yora tsaroshenti, tseencantatsiri, antayetirori caari cameetsayetatsi, oantatsiri, antirori caari yai, matsitantatsiri, pincatsa-tashiyetarori yovetsicayetiri atiri, aisati maaroni amatavitantatsiri, nojocajeiteri antearoqui paamari. Irootaque noshiacantantacariri irampiitajea incamajeitaje.

⁹ Impoji ipocashitaquena aparoni inampire, yora icarajeitiri incaranqui ⁷ ajiriquirori itsotane jaavetachari oja oashinoncaajeitiriri atiri. Ican-taquena:

—Caate, nonijayempiro iroaquera aatsiri ojime: irootaque ijina Ovisha.

¹⁰ Itentashiretanaquena anta antearoqui otishi catsini, inijaapaaquenaro Jerosare: ora cameetsatasanotatsiri nampitsi. Oponeanaca Tasorentsiqui anta inquitequi, aniireapaaque.

¹¹ Ishipaquireacaaquero Tasorentsi, oquem-petaca shipaquireasanotatsiri mapi caari aneapiniti, osaancanatanasotaque catsini.

¹² Otimi nampitsiqui tantorentsi shoncarori, jatatsiri jenoqui. Otimi otantorequi ¹² omoropee, yareetapinitantarori nampitsi; itimi anta ¹² inampire Tasorentsi shentajeitirori. Osanquenataca omoropeequi ivajiropee yora ¹² itomini Ishirairini. ¹³ Otimi mava omoropee anta iquenapai catsirincaiteri, otimi aisati mava omoropee anta iqueanajinta, aisati

otimi omoropee omerequipeequi aisati: jero mava acaquero, jero mava antaqueronta. ¹⁴ Otimi ishaaviji antearo mapi caratatsiri 12, yoanquetantarori oshanincapee mapi. Osanquenataca antearoqui mapi ivajiropee yora 12 itiancanepee Ovisha.

¹⁵ Ari yajiricaquero nampirentsi imoncaratarori nampitsi, yovetsiqueetiro oro. Ari imoncarataquero nampitsi aisati tantorentsi, aisati omoro iroori, iqueapinijeitanti. ¹⁶ Ainiro omerequi tantorentsi ocarati otsipasati, omoncaratavacaaca maaroni. Imoncarataquero, ocarataque omerequi 2,200 quirometero. Aisati oquempetaca ojenoquitaque tantorentsi. ¹⁷ Imoncarataquero otontapatsati, ocarataque 64 metro. Ari nosanquenataquempiro icantaquenari yora nampirentsi.

¹⁸ Iro yovetsicantarori tantorentsi mapi marereayetatsiri, camaranirori. Irointi nampitsi, iro yovetsiqueeyetiri oro, iro cantaincha osaancanataque, maaroni.

¹⁹ Ara tantorentsiqui ainiro antearo mapi ishaavijiniri nocamantacotaqueri incaranqui. Oaneencayetacaro marereayetatsiri mapi, pinatanoyetachari: otimi camaranirori, quisaari, quitamaronirori, quenashiri, ²⁰ potsonanirori, quitioncanirori, camarari, cavoreanirori, quiterinirori, quenashinirori, potsonanirori, jero quiraanirori. Ocarataque onashiyeta mapipee 12. ²¹ Ora ashitacorontsi anta iqueapinitantaroriquinta tantorentsi yovetsiqueeyetiro mapi quitamaronirori. Iro yovetsiqueetiri ashitacorontsi aparo mapi. Aisati

maaroni avotsi anta nampitsiqui yovetsiqueetiro oro, iotaca oro, tecatsi onconoyeari; aisati osaanatanatanotaque.

²² Te noneeroji nampitsiqui ivanco Tasorentsi inquemisantajeitanteari savicajeitatsiri. Aitaque itsoteaquero Tasorentsi aisati Ovisha nampitsi, iquemisantajeitaquero savicajeitatsiri jaocapeerica. Tempa iriotaque Avincatsarite mayetirori maaroni. ²³ Te intimeji catsirincaiteri irooreantearori nampitsi, aisati te intemeji cashiri quitasanteterone: tecatsi incoajeitanteariri. Tempa itimi Tasorentsi, oshequi ishiquairei oquitaitetantari nampitsi. Aisati iquemeta Ovisha, itsioyetaquero. ²⁴ Itsiojeitiri maaroni atiripee; aisati ivincatsaritepee, ipocajeitapaaque, ipincatsajeitapaaquero, icantajeiti: “Tempa icameetsatanotaque Tasorentsi”. ²⁵ Ametapinijeitaca ashitapinitiro anampi tsiteniriqui, iro cantaincha anta te irashitapiniteroji: tempa ocantani oquitaiteti, te ontsitenitimateji. ²⁶ Queario, ipocajeitaque maaroni atiripee ipincatsajeitaquero Tasorentsi, icantajeiti: “Tempa icameetsataque Tasorentsi”. ²⁷ Iro cantaincha eiro otimitsi anta caari cameetsayetatsi, paitapeerica. Aisati eiro yareetatsi antayetirori caari cameetsayetatsi, jaocarica ocantayetari; aisati eiro yareetatsi amatavitantatsiri. Irintiquea areejeitachane sanquenatacojeitachari anta isanquenarentsitequi Ovisha. Iriojeitaque savicatsineri Tasorentsi, incantaitatitempani.

22

¹ Impoji inijaaquenaro nampirentsi antearoja eni, saancajatatsiri, icanteetiro: nija oaneantatsiri. Oponeaca ivincatsarimentoqui Tasorentsi aisati Ovisha, ocontejatapaaque, chararara. ² Oquenajatanaque nampitsiqui nianqui. Otimi otsapijapeequi inchato, oaneantatsiri. Onashiyetaca oitsoqui, ocarajeitaque 12. Maaroni cashiri onashiyetaca oitsoqui timayetatsiri. Irointi oshi oshiaquero aavintarontsi oavisacojeitiriri maaroni atiri. ³ Eiro otimitsi nampitsiqui caari cameetsayetatsi; tempa anta isaviqui Tasorentsi aisati Ovisha. Impincatsajeiteri maaroni quemisantajeitiriri. ⁴ Irineavorojeiteri maaroni, aisati irisatoncaajeitaquearo ivancainaquí ivajiro, maaroni. ⁵ Eiro otsitenitajitsi aisati, eiro icoajeitajitsi intsiojeitanteari aisati catsirincaiteri. Aitaque intsiotacojeiteri iriori Avincatsarite Tasorentsi. Incarajeiteri iriori maaroni, impincatsarijeitanaque.

Ivecarataquero Joa isanquenare.

⁶⁻⁷ Impoji icantaquena inampire Tasorentsi:

—Queariotaque oca icantaqueri Jesoshi, eiro yamatavitimpitsi; icanti: “Eiro osamanititsi nom-pocantajeiri”. Peerani Avincatsarite Tasorentsi yoamejeitaquerini yora camantantatsiniri iquen-quetsatantacari. Meece itiancaquena narori, irootaque noamejeitantaquempiri jaoca oncanteari coajica: eiro osamanitasanotitsi omoncar-
atantajeiri.

Iroimoshirencajeiteri Tasorentsi quemisan-tajeiteroneri maaroni ocantiri oca sanquenar-entsica. ⁸ Nopajita narori Joa. Narotaque quemaquerori aisati neaquerori maaroni oca nosanquenatacotaquerica. Irio onijaquenarori inampire Tasorentsi. Inijantaquenarori, oshequi nopincatsataqueri, notiyeroashivetacari, ⁹ iro cantaincha icantaquena:

—Eiro pipincatsatanatsi, aquempetavacaajeitaca: tempa arojeitaque antavejeitiniriri Tasorentsi. Narori, avirori, aisati piyemisan-taririnteni, yora quenquetsatacantantsiniri, jeri aisati maaroni quemisantajeitirori oca pisanquenatiri: aquempetavacaajeitaca. Eiro catsini pipincatsatanatsi narori, irintiquea Tasorentsi pimpincatsatea.

¹⁰ Impoiji aisati icantaquena:

—Eiro pimanirotsi oca pisanquenataqueri, iro-taintsi omoncarataquea. ¹¹ Eirotsitarica omon-caratatsi nocantaquempirica, incanteani irampi-itapinitero caari cameetsatatsi yantajeitiri, ai-quero irijatatiye. Aisati inquempeteari yora cameetsatatsiri: aiquero irovaajerori yantaye-tiri iriori. Yora quemisantanotatsiri incantai-tatiyempani irimatasanoteneri Tasorentsi maaroni icoacairiri.

¹² Icanti Jesoshi:

—Eiro osamanitanotitsi irosati nompocan-tajeari. Ariorica narejeitapaaquempi, nomp-inajeitapeeri maaroni antajeitaquenarori nocoacairiri. ¹³ Narotaque intacantarori maaroni, aisati

narotaque vecarayerone maaroni. Nojivatasantaque notimini, eiro nocamitsi, irosati noncanteani nontime. ¹⁴ Noimoshirencajeiteri maaroni quivajeitirori iitsaare, impoiiji noshineteri iroajeitearo oitsoqui inchato oaneantatsiri, aisati noshinejeiteri irisavicajeite nonampiqui: inqueajeitapeero omoro iqueapinijeitantari. ¹⁵ Anta saiteriqui itimi tseencantatsiri, matsitantatsiri, antayetirori caari cameetsayetatsi, oantatsiri, pincatsatirori yovetsicashiyetari atiri, coatsiri iramatavitea irisati, amatavijeitiriri itsipapee, maaroni. Eiro yareejeitarotsi irinti nonampiqui. ¹⁶ Narotaque Jesoshi. Notiancaquempiri nonampire, icamantaquempiro noneane povaajeitan-teanariri quemisantajeitanari. Narotaque vetsiquiriri Iravirini, aisati narotaque ishanincani. Noshiacantaqueri impoquiro yora arimampoquitatsiri oquitaitetamani.

¹⁷ Ishire Tasorentsi aisati ijinatsori Ovisha, ocantajeitiri:

—Caate, Novincatsarite.

Tsame maaroni quemajeitirori, pinquempejeitearo, pincantajeite:

—Caate, Novincatsarite.

Aisati avirori, jaocarica pisavicajeitiri: ariorica piquemaquero pitashe, paventeari. Janicarica coaintsine irire, pavantajeiteari: impaquempi nija oaneantatsiri, tecatsi incoacojeitempi.

¹⁸ Jeroa noncamantajeiteriri maaroni neanateroneri oca sanquenarentsica. Moncarat-aca, ari ocarati. Tecatsiya pisanquenataje aisati. Ariorica povaajero, iroasanquetasanotempi Tasorentsi: iroashinoncaasanotempi

onquempetea yoashinoncaasanojeitaqueri
maaroni oquenquetsatacotaqueri oca. ¹⁹ Aisati
oquempetaca, pipeajirocari sanquenarentsica.
Ariorica pimpeajero paitapeerica, eiro
ishinetimpirotsi Tasorentsi oitsoqui inchato
oaneantatsiri; aisati eiro pineirotsi inampi
Tasorentsi, oca oquenquetsatacotirica. ²⁰ Yora
oametaquenarori oca icanti:

—Queario, eiro osamanititsi nompiantajeari.

Aitaque incanteari. Caate Novincatsarite Je-
soshi. ²¹ Nocoaque irineshinoncatasanojeitempi
Avincatsarite Jesoshi. Aitaque incantapiniteani.

Narotaque sanquenatirori: *Joa*

**Irineane tasorentsi oquenquetsatacotaqueri
Avincatsarite Jesoquirishito
New Testament in Asháninka (PE:cni:Asháninka)**

copyright © 2008 Wycliffe Bible Translators, Inc.

Language: Asháninka

Translation by: Wycliffe Bible Translators, Inc.

Asháninka [cni], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Asháninka

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

166be83d-e31e-5665-b8e5-244a7e211a4c